

**Nzaelwapx-krbz Jiszs Mz Jon
Da Kcng Tqyc-kapq-pnzng
Natq Ngr Nzaplxtqngr Mz
Nzaelwapx-krbz Jiszs Mz Jon
Da Kcng Tqyc-kapq-pnzng**

Mc ‘Natq Ngr Nzaplxtqngr Mz Nrpakxmrlz Kx Yr Jon.’ Yrle buk lc mz mzlir yiz 90—97 AD mz nibr Nrpakxmrlz. Aposol Jon yrbzle letz lc mz dzbe lrmakxtr kcng rlimz mz provins kc Esia, tzmnczbzng mz nzaclve-krde, murde pibz Jiszs bade mz nzobq-rmwiblengr. Suti drtwrde nzapqtr-krbzle nabz leplz mz nztu-amqngi-krdr mz mzli r nzakxpungr. Murde nzxplrkr Gct myaszpxle nzxplrkr Setzn, x sa naovxio-atwrnr-ngrde Setzn badr enqmi r Gct amrlx, mzli kc nakrlz-zpwx-ngrbzle mzli kc tqyrlq Gct.

Mz nzobq-rmwible-krde lcng, Jiszs aelwapx-ngrbzle mz Jon kzdung da kx naprtzng, mz nzymne-ebzpxngr kxkqlu. Kxnzrlxngiting drtwrdr tresz'tiu mz drtwr ngr kzdung da mz buk lc, murde rblx nzrkrlzng. A' kzdung da nzopx-angidrng. Mz nzmu-krde lcde, kzdung mzli yokaetipxkr drtwr ngrdr, x kzdung mzli trtingr. Dckrlzdeng 17-18, nzymnetr-ngrdr gzpman kxdrka'ngr kc navzm na-aclvele nrlc atwrnrngr. Gzpman lc apule srlx, murde batrpzle mz leplz nzrlasz-krdr Gct x nzvz-nqblq-krdr nqmqrde kxtrka. X nzyrlq drtqde “Bxbilon” nqmqr

krde lc tqtrka. Murde mzli kc bqnc, lr Bxbilon nzaovxiolr lr Jiu x nzbatrplzlr badr nzngini-krdr kxnzawz-nrbalqng. X nzbatr-kzplzlr nzangio-krdr gct ngrdrng, da kc tqwai nzmc-krqule mz Buk sc Daniel. A' mz buk lc, Bxbilon drtwr ngrde gzpman ngr Rom mz mzli nyz Jon. X drtwr ngrde kz kx gzpman kx na-apule Rom sa navzm. X mz gzpman lc, Enqmi Kxetu ngr Kraes sa na-acleve-atwrnr-ngrde nrlc. Nzrpi-ngrbz “Mrlx Kc Tqdrka'ngr Kc Kai.”

Jon yr-kzle kzdung nabz kx nzngr-ngrdr Heven. Nabz lcng amrlx nangr-ngrgu mz #123 mz Buk Ngr Nzangiongr.

Jiszs Kxnzmcpx Myapxbz Mz Buk Lc

Aelwapx-ngrde zluli rde. [*dckrlzde 1*]

Aclvele dzbe lrmakxtr nedeng mz nrlc. [*2—3*]

Nide Nei Sip kc tznibq x lu-mop, x nzangio kxnzrlxngiting amrlx. [*4—5*]

Nzayrplapxngr amrlx mz yiz kcng rlimz tzr-pibz Mzli r Nzxpungr Kxtrka-zlwz. [*6—19*]

Jiszs yzlu-mou-ngrmle mz Jerusalem kxmrna, murde na-acleve nrlc mz nzngini-krde King r king amrlx. [*19—22*]

¹ Ninge Jon, kxnzawz ne Jiszs. Krlcng da kx naprtlzng kx aelwa-ngrm Jiszs bange. Rlr-ngrbz Gct mz Jiszs da lcng tqycpe pipz nzprt-krmlr; mz nzvz-nqblq-krde me pnz drtwrde, murde na-aelwa-ngrbzle mz kxnzawz nedeng. X Jiszs atwzlr-ngrmle dq enjrl nede bange, murde nayokaetipxmle bange drtwr ngr da lcdeng. ² Mz nzmu-krde lcde, sc tqyropex da amrlx kcng tqmcxng x tqxlrxng. Krlcng natq Gct x nrpa

angidr ngr Jiszs Kxnzmcp^x. ³ Namrlz^{bz} mz doa kx rlxpxle natq l^{ng} tqyrox mz buk lc. X namrlz-kzpz mz leplz kcng t^zxlrlr x t^zyr^{lq}-angidrlr natq l^{ng}. Murde sa nakrlz-angidrlr da l^{ng} amrlx mzli kc tqycpe pipz nzprt^z-krmlr.

Jon Ryrbz Mz Dzbe Lrmakxtr Mz Taon Rlimz Mz Esia Provins

⁴⁻⁵ Ninge Jon, ryrbo bamu nimu dzbe lrmakxtr kcng mz taon rlimz mz Esia Provins.

Krka'-ngrne kx zmrlz^{kx}myalz x nzmnc-zpwxngr na-avzom Gct, Mqngrkxtr x Jiszs Kxnzmcp^x bamu. Gct kc tqmnc mzli ka, x tqmnc zvz, x sa navzm. X Mqngrkxtr kc tqmnc mz tron kc tqwxbungr Gct x nzwz-krdeng kcng rlimz. X Jiszs Kxnzmcp^x kc tqrpipx angidr natq Gct, x doa kx nzatulz-kaip mz nzbzng^r, a' trpengr nzbz-krde. X nide kc tqaclvele king amrlx mz nrlc tulvzo. ✧

Jiszs Kxnzmcp^x lc mrlzti-zvzle nigu, x aopxpe-bzle drtqgu mz zmatq ngr alwx rgung mz nzbzo-krmle mz kros. ⁶ X ata-lxbltrle nigu mz dzbede kc esz', murde nawztrpzku mz Gct Trtede, kc tqngi King rgu, mz nzngini-kr^{gu} pris nedeng. Takitrde nzglqlz-zvzng^r nide mz nzetukr zmatq ngrde, kc tqvzpe tqvzpe. Eu, angida. ✧

⁷ Jiszs sa navzom natuom mz dcbz. X sa namc leplz amrlx ngr nrlc tulvzo, nidr badr leplz kcng t^zr^batr^pzng nzrluplxtingr nrkrdr^{tq} Jiszs mzli kc.

✧ **1:4-5** Sam 89:27; Nzyrplapxngr 14:5, 25; Jeremaea 42:5; Rom 8:29; 1 Korint 15:20-22; Filipae 2:9-11; Kolosia 1:18; Hibru 12:23; Nzaelwapxngr 17:14; 19:16 ✧ **1:6** Nzrlaszng^r 19:6; Asaea 61:6; 1 Pita 2:5, 9; Rom 12:1; Hibru 13:15

X leplz amrlx mz nrlc sa namwxlrng x nayrni-zlwzng. Me tutr-ngrde lape! Eu, angida. ✧

⁸ Rpi Yawe kx, “Ninge Gct kc tqrninr, kc tqmnc mzli ka, x tqmnc zvz, x sa navzm. Ninge nou da amrlx x kx ayrkrpx da amrlx.” ✧

Jiszs Kxnmcpx Opx Mz Mz Jon Apule Mrlx Leplz

⁹ Ninge Jon, x prtrku mz dzbede kc esz' mz nztu-amqngi-krngu kxmule-esz' nzaetqbz drtqgu murde mnczbzku mz Jiszs mz nzngini-krde King rgu. Nzadwatrlr ninge presin mz trmctu Patmos, murde yapwxtipx-zvzx natq Gct x Nrpa ngr Jiszs.

¹⁰ Mz kzdq Sade mrlc, zmatq ngr Mqngrkxtr prsrle ninge, x obq-rmwiblex. Mzli lcdepwz xlrkixle mz nibrnge kzdq natq Kraes kxetu apule nzyrnigr trpu. ¹¹ Rpile kx, “Yro mz buk da amrlx mcqng, x atwzlr-ngrbz buk lcde mz Esia Provins mz dzbe lrmakxtr mz taon rlimz seleng: Efiszs, Simrnz, Prgamzm, Taeatira, Sadis, Filadelfia x Laodisea.”

¹² Kx lxlvrkimc kc mq mz nzmc-krnge kc tqy-cmnem bange, mcx da rlimz kx ngi gol kxwxbuo-ngrm lam. ✧ ¹³ X mz mzlirdr, kzdq ncblo, kx apule Mrlx Leplz, kq nzkq kxboi, x lunyao-ngrde kc da kx apule gol. ✧ ¹⁴ Nqngi narde prkitxpx apule nqbya ngr nrc. X mzte nzapulr nalzpq nyr. ✧ ¹⁵ X nanycde kz nzapulr nzpnaprkr bras kc tzayrleni mz nyr x sc tzalqtipe. X nzokr natqde

✧ **1:7** Daniel 7:13; Sekaraea 12:10-11; Matiu 24:30; Jon 19:37; 1 Tesalonika 4:17 ✧ **1:8** Nzrlaszng 3:14; Asaea 44:6; 48:12; Nzaelwapxngr 1:8, 17; 2:8; 21:6; 22:13 ✧ **1:12** Sekaraea 4:2-6 ✧ **1:13** Daniel 7:13; 10:5 ✧ **1:14** Daniel 7:9

apule nzyrpukr nrc. ☆ 16 X malele mz mqde kxrte vri rlimz, x lvcpxm mz naode kc toki r vea kxmalc nrlarde rllir, x nzyzlrkr rtrlrnzte apule nzlulikr nepi mzli kc bea. ☆

17 Kx mcx kc nide, rtco-lzbq-ngrbo mz nanycde apux ncblo kx bz, mz nzangio-krnge nide. A' mqde kxrte bxtuple ninge x rpimle bange kx, "Bzkq mwxlrg. Ninge kx rtwayz x ninge kx rmnr-ngrbz. ☆ 18 Ninge nou nzlungr. Bzx mzli kc ena, a' nzlupе-mou-krmc lc mzli ka tqvzpe tqvzpe. Lolvzx zmatq ngr nzrlvxngr x nzrbqtrngr naonrx ngr mrnyz mqngr leplz kxnbzpeng. ☆ 19 Yro da kcng tqmcqng, tqprtllzng mzli ka, x da kcng naprtllzng mz nibrde. 20 Drtwr ngr vri lcng rlimz tqmalex mz mqnge kxrte x da rlimz kx ngi gol kxwxbuo-ngrm lam nidr sele. Vri kcng rlimz drtwr ngrdr kxnzactvelr dzbe lrmakxtr mz taon kcng rlimz, x da rlimz kx ngi gol kxwxbuo-ngrm lam, drtwr ngrdr dzbe lrmakxtr mz taon lcng rlimz."

2

Letz Nangi Sc Dzbe Lrmakxtr Kc Efsisz

1 Jiszsz sc tqycmnm bange, mz nzngini-krde ncblo kc tqapule Mrlx Lepz. Rpi-mople kx

☆ **1:15** Esikel 1:7, 24; 43:2; Daniel 10:6 ☆ **1:16** Asaea 11:4; 49:2; 60:1; Daniel 10:6; Malakai 4:2; Matiu 13:43; 17:2; Efsisz 6:17; Hibru 4:12 ☆ **1:17** Asaea 44:6; 48:12; Nzrlaszng 33:20; Asaea 6:5; Esikel 1:28; 3:23; 43:3; 44:4; Daniel 8:17-18; 10:7-10; Matiu 17:7; Aposol 9:3-4; Nzaelwapxngr 1:8; 2:8; 21:6; 22:13 ☆ **1:18** Matiu 16:16; Jon 1:1-3; 6:57; 14:6; Hibru 2:14; 3:12; 9:14; 10:31; 12:22

nayrbz dq natq mz kxacivele dzbe lrmakxtr kc
mz taon kxetu Efisz. Rpibzle kx,

“Krlcng natqng, ninge kc tqrmale vri kcng
rlimz mz mqng kxrtc x ninge kc tqayox mz
mzlr da rlimz kx ngi gol kxwxbuo-ngrm lam.

² Krlzpex nqm q krmu, nimu lr Efisz. Wz-
katoamu x tu-amqngi-zvzamu mz nzvz-nqblq-
krmamu ninge. Krlz-kzx kx pxtxpx-ngrnamu
leplz kcng nqm q krdr tqtrka. X obqplxtrpeamu
ncblo kcng tzrpilr nidr kxnzakrlzng ne Kraes,
a' trtingr. X rmctitrpzmu kx nzpokiang, x
nqm q krdr rngidrlvz-ngrbzmu mz leplz kx
bzkq nzvz-nqblqlr. ³ Krlzx nztu-amqngi-zvz-
krmu mz nrlarde nyznge. X kxmule-esz'
nzatrkatilr nimu, a' nzrlxngiti-krmu trbaou
mz nzvz-nqblq-krmu ninge. ⁴⁻⁶ Eu, x mrlz
kz nzpxtxpx-krmu nqm q kr leplz kcng tzvz-
nqblqlr nzalvztrkr Nikolas, da kc tqwai-kzx mz
nzpxtxpx-krngele.

“A' da kx trmrlztr-ngrpwzu drtwrnge bamu
nide sele. Trmrlzti-lzbqpewamuu da kc
tqwaisr-lzbq-ngrnamu mzli kc tqlxngiti-ate-
ngrnamu ninge. Nadcpv zvz mz drtwrmu
mrkc tqesakingr nzvz-rbr-krmu. Drtwrmu
nayzlum mz alwx ngrmung, x nqm q krmu
na-apule mzli kc tqlxngiti-ate-ngrnamu ninge.
Nzmu drtwrmu kx tryzlupleu, ninge la navzmc
bamu x nakatxx dzbe lrmakxtr nyzmu mz
nzmnc-krmamu bange, mz nzkatx-krnge da
kx wxbuo-ngrm lam kc tqngi gol mrkc tqtulz-
ngrmle mz mzlirmu. Murde trvz-nqblq-
angidrpeawamuu ninge. ☆

☆ 2:4-6 Matiu 24:12

7 “Abzamu nzyrlq-angidr-krmu natq lcong tqpibz Mqngrkxtr mz dzbe lrmakxtr lcong. Murde mrlx kx aovxiole mz nzvec-krdr badr zmatqng kxtrka, sa narlr-ngrbo bade nzngq-krde Nranc ngr Nzlungr Kxmrna kc tqtu Me Mncngr Gct.” ✧

Delape. Ninge Jiszs.

Letz Nangi Sc Dzbe Lrmakxtr Kc Simrnz

8 X Jiszs nzngini-krde ncblo kc tqapule Mrlx Leplz, rpi-mople bange kx nayr-kzpo dq natq mz kxacivele dzbe lrmakxtr kc mz taon Simrnz. Rpibzle kx,

“Krlcong natqng, ninge kxrtwayz x kxrmnr-ngrbz, ninge kc tqbz mzli kc ena, a' mzli ka lupe-mopwc'.” ✧

9 Krlzpex nzetqkr drtqmu, nimu lr Simrnz. X kxmule-esz' tr-rngismuu trau, a' mz nrlarde nyz Gct nginimu kz bcnyr angidr mz nzrlxngiti-krmu. Krlzpe-kzx nzrpikitikr leplz kcng tztulrtr-lzbq-ngrdr nzngini-krdr lr Jiu. A' trnzngini-angidru leplz kcng tqmcpxng Gct, murde nidr dzbede kc tzangiolr Setzn. ✧

10 Bzkq mwxlramu mz da trka naprtilzbzng bamu. Kzdzq la mzli, enqmi rmung sa nalolvzlr nimu x na-adwatrlr nimu mz presin mz nzabzpxngr nzrlxngiti-krmu, murde nzvz-nqblqlr drtwr Setzn. X naetqti drtqmu zbq nzpnu naesz'. A' abrtrpa'mu drtwrmu bange, kxmule-esz' nznibqlr nimu. Murde mz nibrde,

✧ **2:7** Nou 2:9; Nzaelwapxng 22:2 ✧ **2:8** Asaea 44:6; 48:12; Nzaelwapxng 1:8, 17; 21:6 ✧ **2:9** Jon 8:44-47; Rom 2:28-29; Filipae 3:3

sa nakabo bamu nzlungr kxmrna, nangi da kxmrlz kx vzpxm mz nzrlxngiti-krmu.

¹¹ “Abzamu nzyrlq-angidr-krmu natq lcnq tqpibz Mqngrkxtr mz mz dzbe lrmakxtr lcnq. Murde krkcng tzaovxiong mz nzvec-krdr badr zmatqng kxtrka, trnabzpeung mz nzbzngr kxrmnr-ngrm mzli kc Gct na-ayrplapx-ngrde lr nrlc kcng tzvz-rbrng.” ✧

Delape. Ninge *Jiszs*.

Letz Nangi Sc Dzbe Lrmakxtr Kc Prgamzm

¹² X Jiszs nznngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxaclevele dzbe lrmakxtr kc mz taon Prgamzm. Rpibzle kx,

“Krlcng natqng, ninge kc tqrngisc toki r vea kxmalc nrlarde rlilr.

¹³ Krlzx mrla tqmnc-ngrnamu mrkc tqaclve Setzn. A' nimu lr Prgamzm vz-nqblq-angidramu ninge, x abrtr-angidrmamu drtwrmu bange. Trmwxlrwamuu nzpipx-krmu nzabrtr-krmamu drtwrmu bange, kxmule-esz' Antipas nznibq mz taon nyzmu kc tqaclve Setzn. Antipas lc aelwa-ngrbzle vz-nqblqle ninge mz nzymne-krde x nzale-krde da.

¹⁴ “A' da kxpipz kx trmrlztr-ngrpwzu drtwrnge bamu nidr seleng. Kzdung nimu sc tzvz-nqblqlr nzalvztrkr Profet Balam. Mzli kc bqnc alvztrle King Balak kc Moab nzesabrti-krde lr Israel murde nataong mz alwx. X pibzle badr nzmu-krdr dakxnzng kx ngi blz

✧ **2:11** Nzaelwapxng 20:14; 21:8

nzkabz mz mɔngɾ drka' kxnzlz, x aprtrle nidr mz nzrmwimngɾ doa kx trngiu kɾnalzdr. X mzli ka kzdung nimu nzvz-nqblqlr nɔmq krde. ✧ ¹⁵ X kzdung nimu sc tzvz-nqblql-kzlr nzalvztrngɾ kxtrka sc dzbede ne Nikolas. ¹⁶ Tekqtramu nɔmq krmu lcng tqtrka! Nzmu kx trtekqtrwamuu nɔmq lcng, sa napwrkilvc-ngrnamu ninge mz nzota-krgr badr leplz lcng, mz toki r vea kc tqmalc nrlarde rilr tqlvcpxm mz naonge. ¹⁷ “Abzamu nzyrlq-angidr-krmu natq lcng tqpibz Mɔngɾkxtr mz mz dzbe lrmakxtr lcng. Murde mrlx kx aovxio mz nzvec-krdr badr zmatqng kxtrka, sa nakabo bade dakxznng nange kxmɾna kc tzipibz ‘mana kc tqyc-kapq.’ X mz nzabrtzlvz-krnge nide sa naka-kzpo bade rplz kxprki kx yctrngɾ drtqde kxmɾna. X drtq kxmɾna lc, trgalr kxrkrzl, a' krlz txpwz ncblo kc tqrngisc rplz lcde.” ✧

Delape. Ninge *Jiszs*.

Letz Nangi Sc Dzbe Lrmakxtr Kc Taeatira

¹⁸ X Jiszs nznngini-krde ncblo kc tqapule Mrlx Leplz rpi-mople kx nayr-kzpo dq natq mz kxa-clvele dzbe lrmakxtr kc mz taon Taeatira. Rpibzle kx,

“Krlcng natqngɛ, ninge Mrlx Gct kc mzke' tqapule nalzpq nyr, x nanyonge apule bras kc tzalqtipe.

¹⁹ Krlzpɛx nɔmq krmu, nimu lr Taeatira kx lxngiti-txpwzmu ninge. Murde sc tqvz

✧ **2:14** Nzqqlu-krdr 22:5, 7; 25:1-3; 31:16; Lou Kcpwz 23:4

✧ **2:17** Asaea 62:2; 65:15; Jon 6:48-50

zvz nzmrlzti-lzbq-krmu x nzokatr-etr-krmu. X krlz-kzx kx kxmule-esz' nzaetqbz drtqmu, a' tu-amqngi-lxblr-zvzamu. X aleamu da kx myaszpxpele mzli kc tqlxngiti-ate-ngrnamu ninge. ²⁰ “A' da esz' kx trmrlztr-ngrpwzu drtwrnge bamu. Murde rlr-ngrbzmuz mz olvz kc tqapule Jesebel kc bqnc, nzmncbe-krbzle bamu mz nzapokiati-krde nimu kx nide profet ne Gct. Leplz nzkqlupeng kx ycpxpe nzalvztr-krde mz nzrpi-krbzle badr nzrmwimi-abeane-krdr doa kx trngiu krnalzdr x nzmu-krdr dakxnzng kx ngi blz nzkabz mz mqngr drka' kxnzlv. ✧ ²¹ Kapebo mz olvz lc mzli r nztekqtr-krde nqm q ngr drtwrde, a' pxtpx-ngrde x sc tqvz zvz nzrmwimi-abeane-krde doa kx trngiu krnalzde. ²² Mz da lcng tqtrka, sa na-amnc-zvzbo nide mz nelvq mz zyagox kxtrka, nidr badr krkcng tzprtrpeng mz alwx ngrde, nzmu kx trnztekqtrlu nqm q nr drtwrdr. ²³ X sa namilxtxobo doa kcng tzvz-nqblq-zvzlr nide. Murde kxnzrlxngiting mz taon amrlx nakrlzlr kx *obqplxtix nabz leplz x nzvzkr nardr*. X sa na-ayzlu-ngrbo bamu mz nzvz-nqblq-krde da kx aleamu. ✧

²⁴⁻²⁵ “A' kzdu nimu lr Taeatira trnzvz-nqblqlru nzalvztrkr Jesebel lc. X trprtrp-wzmuu mz da kc tzrpibz ‘da kx yc-kapq sc Setzn.’ X napibo bamu kx trtxpnzng natq mou

✧ **2:20** 1 King 16:31; 21:25-26; 2 King 9:22, 30 ✧ **2:23** Job 34:33; Sam 7:9-10; 26:2; 62:12; 139:1; Nzyrplapxngr 24:12; Asaea 40:10; 59:18; 62:11; Jeremaea 17:10; Matiu 16:27; 25:31-46; Rom 2:6; 2 Korint 5:10; Galesia 6:7-8; 2 Timoti 4:14; Nzaelwapxngr 2:23; 20:13

kx nayrlqamu, a' lolvz-amqngiamu nzlxngiti-krmu ninge, da kc tqwai nzlolvz-zvz-krmule, navz navz mzli kx nayzlu-ngrmc. ²⁶⁻²⁷ Murde zmatq kcpwz tqkam Trtenge bange, sa nakabo mz mrlx kx aovxiole mz nzvec-krdr badr zmatqng kxtrka, x nzyrlq-angidr-krde natqnge navz navz nakrlzbzle nzyrkrpxkr nrlc. *X sa nakabo bade zmatq ngr nzaclvengr neidu amrlx mz nrlc tulvzo. Sa na-aovxiole mrnyzdr mz nzxplr-krde, kc na-apule bz kc tqrniglc botol.* ☆ ²⁸ X mz nzaelwapxngr nzaovxio-krde, sa naka-kzpo bade paglxnrlc, kc tqngi rkx ngr zbq kxmrna nyz Gct. ☆

²⁹ “Abzamu nzyrlq-angidr-krmu natq lcnq tqpibz Mqngrkxtr mz mz dzbe lrmakxtr lcnq.” Delape. Ninge *Jiszs*.

3

Letz Nangi Sc Dzbe Lrmakxtr Kc Sadis

¹⁻² X Jiszs nzngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxaclevele dzbe lrmakxtr kc mz taon Sadis. Rpibzle kx,

“Krlcnq natqnge, ninge kc tqrngine Mqngr ne Gct kc nzwz-krdeng rlimz x rngine kz vri kcnq rlimz.

Krlzpex nqm q krmu, nimu lr Sadis kx tr-takitrkaple mz nzobqkr Gct rnge. Nzrpilr kx lubeamu, a' trtingr, murde bz-angidrpeamu. Dwalzmamu! Axplrtiamu nzlu-mqglq-krmu,

☆ **2:26-27** Sam 2:8-9; Asaea 30:14; Jeremaea 19:11; Nzaelwapxngr 12:5; 19:15 ☆ **2:28** Luk 1:78; 2 Pita 1:19; 1 Jon 3:2; Nzaelwapxngr 22:16

murde ycpe pipz nzyrkrtxpx-krbzle. ☆
 3 Mzpu naobqpx zvx x natekqtramu nqmq ngr drtwrmu. Murde ma tqprkilvc-ngrnamu ninge nzapu-krnge ncblo kxpnada. Trnakrlzwamuu mzli kc navz-ngrmc. Bzkq mrbrtr mz drtwrmu da kcng tqmrlz tzpibz bamu x tqxlramu. X yrlq-angidramu natq lcng. ☆

4 “A' nimu kxpipz mrkc Sadis kx lrpz scdr trblqkiu, sa nakqamu lrpz kxprki mzli kc navz-lxblr-ngrgu murde takitrde nimu.

5 “Mrlx kx aovxiole nzvec-krdr badr zmatqng kxtrka, sa nakq lrpz kxprki na-apule lr Sadis lcdeng, x trnakapxpw'c'u drtqde mz Buk ngr Nzlungr. A' napipxbo mz Trtenge x enjrl nedeng kx ni-angidrde doa nenge. ☆

6 “Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng.”
 Delape. Ninge *Jiszs*.

Letz Nangi Sc Dzbe Lrmakxtr Kc Filadelfia

7 X ncblo kc tqapule Mrlx Leplz rpi-mople bange kx nayr-kzpo dq natq mz kxacivele dzbe lrmakxtr kc mz taon Filadelfia. Rpihzle kx,

“Krlcng natqng, ninge kc tqtr-esz'ngr x tqngi da angidr. Lolvzx ki sc King Devet, kc drtwr ngrde kx rngiscnge zmatq ngr nzrlvxngr naonrx kx trpnzng kx rkrlz nzrbqng, x zmatq

☆ **3:1-2** Nzaelwapxngr 1:4-5, 16 ☆ **3:3** Matiu 24:42-44; Mak 13:33-37; Luk 12:39-40; 1 Tesalonika 5:2-4; 2 Pita 3:10; Nzaelwapxngr 16:15 ☆ **3:5** Nzrlaszng 32:32-33; Sam 69:28; Matiu 10:32; Luk 12:8; Nzaelwapxngr 20:12

ngr nzbqngr naonrx kx trpnznggr kx rkrllz nzbvlxnggr. ☆

8 Krlzpx nqm q krmu, nimu lr Filadelfia. Kxmule-esz' trnipwamuu kxnzetung, a' yrlq-angidramu natqngge x trtxpnznggr nzbpi-krmu kx trkrllzwamuu ninge. Delc, naonrx se tqlvpxbo bamu, naonrx kx trpnznggr kx rkrllz nzbqtrnggr. 9 “Lalztqmamu bange. Dzbe leplz kcng tzangioldr Setzn tzrpilr nidr lr Jiu, a' nzbpokia-ngdrdr. Sa navzmimc nidr mz nzavzolz bq-krbzlr bamu, murde nakrlzlr kx mrlztlzlwzx nimu. ☆ 10 X sa na-arlapxbo nimu mz da kcng tqtrka naprtzbx mz leplz amrlx mz nrlc mz nzayrplapxnggr nidr, murde mz nzyrlq-angidr-krmu natqngge, tu-amqngizvzamu kxmule-esz' nzaetqbx drtqmu. ☆

11 Mzli trnzboi-krdeu x sa nayzlupe-mopwc'. ☆ Lolvz-amqngiamu nzbvxngiti-krmu ninge murde ma tzangqngutilr, x sc tr-rtwzpwamuu da kxmrlz mz nzaovxio-krmu mz nzvecnggr.

12 “Murde mrlx kx aovxio mz nzvec-krdr badr zmatqng kxtrka, nide kx navzmibo mz Gct rnge na-apule nctrpou ngr Mangr-nzangiongr kxmRNA, x trtxpenggr nzdwaz-krdele. X nayrtrpo bade drtq kxmRNA lcde seng tq. Drtq kx ayrnrnggr drtq mzteadau nyz Gct, Jerusalem kxmRNA kc tqvzom Heven. Murde Jerusalem kxmRNA nangi mrnyzde. X drtq krall drtq Gct rnge, murde nide doa ne Gct. X

☆ **3:7** Job 12:14; Asaea 22:22; 40:25; Habakuk 3:3; Mak 1:24; Jon 6:69 ☆ **3:9** Asaea 45:14; 60:14 ☆ **3:10** Matiu 10:22; 24:13; Mak 13:13; Rom 2:7; 1 Timoti 4:16; 2 Timoti 2:10-12; Hibru 10:36; Jemes 1:12 ☆ **3:11** Nzaelwapxngr 22:7

drtq kratq drtqnge kxmrna, murde ni-kzde doa nenge. ✨

¹³ “Abzamu nzyrlq-angidr-krmu natq lcnq tqpibz Mqngrkxtr mz mz dzbe lrmakxtr lcnq.”
Delape. Ninge Jisz.

Letz Nangi Sc Dzbe Lrmakxtr Kc Laodisea

¹⁴ X Jisz nznngini-krde ncblo kc tqapule Mrlx Leplz rpi-mople bange kx nayr-kzpo dq natq mz kxacivele dzbe lrmakxtr kc mz taon Laodisea. Natq lc nide sele.

“Krlcnq natqnge, ninge kc tqapux natq lc tqngi ‘angida’ murde ninge kc tqrngi-batrpz da amrlx mz nzvz-nqblq-krde me pnz drtwr Gct. X ni-kzngce ncblo angidr kc tqrpipx-angidrpe natqdeng. X ninge nou da amrlx kcng tqwzngc Gct. ✨

¹⁵ Krlzpex nqmq krmu. Krlzx kx trvz-nqblqwamuu ninge mz drtwr kxpq o drtwr kxbao. A' na-aoti drtwrmu me navz-nqblqkiamule, murde drtwrmu napqtrpz o nabaotrpz. Bzkq drtwrmu li. ¹⁶ A' mz nznngini-krmu ncte lxblr mz da amrlx x pq-lrpiamu, sa nabyapx-ngrne nimu na-apule lue kxtrka. ¹⁷ “Rpianu kx nimu bcnyrng, x rngiscpemu da amrlx kcng tqsutu drtwrmu. A' trkrlzwamuu kx mz nrlarde nyz mqngm x nabzmu tatxpxamu mz da amrlx mzli ka. Mz nzobqkr Gct, nimu leplz kxdrka'ngr, kxnzyc mz drtwr, kxtrnzrngiscung, kx mzpu mwi x ychlamu. ¹⁸ Rlr-ngrmamu bange nzka-krbo bamu da kx na-atubqtile nimu mz

nzobqkr Gct. Rlr-ngrmamu bange nzxpe-krbo alwx ngrmu mz nzbz-krnge, na-apule kx xpeamu gol. Delc nanginimu bcnyr angidr mz nzrmcti-krmu nzlungr kxboi. X apxitr-lzbq-ngrnamu lrpznge kxprki ngr nztubq-esz'ngr-krnge, murde drtqmu ma tqmya mzli kc navz-ngrmc. Murde mzli lc naoliqti-angidramu ninge. X rlr-ngrmamu bange nzaelwa-lzbq-krbo bamu, murde nakrlz-angidramu ninge na-apule luekxpiz kx ngi tolo kx nakitramu mz mzpu mz nzobq-angidr-krmu. ¹⁹ Krkcng tqmrlzti-zlwzxng krlzx nzlclvz-krbo badr da, x nzayrplapxngr nidr. Mz nzmu-krde lcde, drtwrmu nayzlu, x napqtitr drtwrmu ninge. ✧

²⁰ Murde ninge la tqtutrp yz mz naonrx nyzmu, tqabctrpo mz nzaenzli-krnge nzvzmitr-krmu ninge. Doa kx xlrle natqng x lvxpxmle naonrx bange, sa nadwatrpo ma nyzde mz nzmu-lxblr-krgr ncd. ²¹ “Mrlx kx aovxio mz nzvec-krdr badr zmatqng kxtrka, sa na-awxbuox nide mz tron mz nzwxbu-krgr badr mz nzaclvengr. Da kc tqwaix mz nzaovxio-krnge mz nzvec-krgr badr zmatqng kxtrka, x wxbupekr ncd. Trtenge mz nzaclvengr.

²² “Abzamu nzyrlq-angidr-krmu natq lcng tqpibz Mqngrkxtr mz mz dzbe lrmakxtr lcng.”
Delape. Ninge *Jiszs*.

4

Jon Mcle Nzangiongr Gct Heven

✧ 3:19 Nzyrplapxngr 3:12; Hibru 12:6

¹ Mz nibr nzxlr-krnge letz lcng, obq-rmwible-moux x opx mz mzke' kc naonrx kx obq Heven. X sc tqxlr-moux natq Kraes kc etu tqapule nzyrnigr trpu, tqycmne-kaip ena bange. X rpi-mople kx, “Vzdm mrka, murde na-aelwa-ngrbo bam da kx naprtilmqng mzli lc navzm.” ² X mzli lcpwz, Mqngrkxtr sc tqprsre-moule ninge. X mcx kc tron Heven, x wxbuom kc Kxetu elr. ✧ ³ X Kxetu kc tqwxbuom mz tron lcde, mzte apule nzyaglqkr rplz kx opx, x nznaprkr rplz kxpc. X o-ngalelvzle tron nrpc' kx nilz rde apule rplz kx mqbq. ⁴ X mc-kzx tron nznpu-li-nrade-pwx (24) nztu-ngalelvzlr tron nyzde, x kxnzaclveng nznpu-li-nrade-pwx nzwxbuomqng elr, nzkg-lxblrng lrpz kxprki, x nzabx-lxblrng mz kraon kx ngi gol. ⁵ X mclz-kzx nzaglqpz'tikr bzlrpc x xlrlzx nzyrputipxkr bzlrmei mz tron. X mrkc tqxlvrkipx tron woutrpz elr lam rlimz, rkx ngr Mqngrkxtr ne Gct kc nzwz-krdeng rlimz. ✧ ⁶ X yctr-kzpz kc elr da kx apule prla kx ngi dzpq kx otppx. ✧ X nztu-ngalelvzlr nrlar tron kcng pwx krkcng tzlung kcng pwx. X mztr kqlu kxnzobqpx-kaing x kxnzobqpxng mq. ⁷ X krkcng tzlung, kx ayrrngr apule laion, krli apule nei kzu kxnclongr, kratq mzte apule mz ncblo, x krapwx apule lr kc tqvcpe. ⁸⁻¹⁰ Kxnzung lcng pwx nabxdr esz'mz lxblr, x nrkrdrtdr yrlwr-ngalelvz mztr x wai-kzle nabz nabxdrng. Nzglqlzlr x nzangioldr x nzawibzng mz Kxetu kc tqwxbuom mz tron, tqlu-zvzpe. X mz nrlckxn-

✧ **4:2** Asaea 6:1; Esikel 1:26-28; 10:1 ✧ **4:5** Nzrlaszng 19:16; Esikel 1:13; Sekaraea 4:2 ✧ **4:6** Esikel 1:5-10, 22; 10:14

grlx x mz nrckxbq tresakiu nzngr-krdr kx,
 “Yawe, Gct kc tqrninr,
 Drtqm q tr-esz'ngr.
 Nimq kc tqmnc mzli ka,
 X tqmnc zvz, x sa navzm.” ✧

X mzli lcdepwz, kxnzaclveng kcng nznpu-
 li-nrade-pwx nzwweobzng zpr mz Kxetu kc
 tqwxbuom mz tron, tqlu-zvzpe. Nzkaobzlr kraon
 ngr nardr mrkc tqxlvrkipx tron, x sc tzngrpeng.

¹¹ Nzrpibzlr kx,
 “Yawe, nipem Gct rgr.
 X takitrde nim
 Nzrglqlzng, nzangiongr,
 X nzwpxngr zmatq ngrm.
 Murde wz-ngrn doa amrlx,
 X da amrlx mz nrlc.
 X mz nzwz-krmqleng
 Nzmnckrdr x nzwzkrdr,
 Nzvz-nqblqlr me pnz drtwrm.”

5

Nei Sip Kc Heven

¹ Zbz mcx kc skrol kx apule lrpzu kxboi
 kxnzbu. X male Kxetu kc tqwxbuom mz tron
 mz mqde kxrtc. X skrol lc nzyr nrlarde rlilr.
 A' nzbupe x nzabli-kzo-ngrde nrlc rlimz mz
 kadol kx apule bq lr nounc. ✧ ² X mcx
 kc enjrl kx matq-esz'ngr, x sc tqetumipe nate
 nzwpi-krde kx, “?Neke takitrde nzniglcng
 kadol lcng rlimz murde nakawxpxle skrol lc?” ³ A'
 trpnzng kx nzwrmcti Heven, mz nrlc, x mrnyz

✧ **4:8-10** Esikel 1:18; 10:12; Asaea 6:2-3 ✧ **5:1** Esikel 2:9-10;
 Asaea 29:11

mōngr kxznzbpeng kx takitrde. ⁴ Sc tqyrnitx-zlwzpe. ⁵ A' kzdq kxnzaclve lēng rpimle bange kx, “Bzq yrniq! Mcpwz! Laion ngr Neidu lr Judz. Ncblo kxmatq kc tqngi melrmqde King Devet, x aovxiopēle nzvecngr. Sa naniglcle kadol lēng rlimz murde narkawpx skrol lc.” ✧

⁶ Zbz mcx kc Nei Sip tutrpz mrkc tqxlvrkipx tron, x kxnzlung kcng pwx x kxnzaclveng kcng nzpnu-li-nrade-pwx (24) nztu-ngalelvzlr nide. Nei Sip kc opxm kx nznibqpe. X tutrpz bade dxpa' rlimz kx ngi rkx ngr zmatq ngrde. X mzte rlimz kz, rkx ngr Mōngrkxtr ne Gct kc nzwz-krdeng rlimz, kx atwzlrpx-ngrde mz nrlc tulvzo. ✧ ⁷ Nei Sip sc tqvzpebz mz Kxetu kc tqwxbuom mz tron x otibzle skrol kc tqmalele mz mōde kxrtc. ⁸ X mzli lcpwz, kxnzlung kcng pwx x kxnzaclveng kcng nzpnu-li-nrade-pwx nzrtco-lzbq-ngrbzng mz Nei Sip nzglqpx-krdre. X nzrtaplxsrng gita x dis kx ngi gol yrbu lxblr mz bqlr nc ninz, krlcng nzkrka'kr leplz neng Gct. ✧ ⁹⁻¹⁰ Zbz sc tzngr-ngrdr kc nabz kxmrna, mz nzrpi-krdr kx,

“Nipem ncblo kx rtwz skrol la,

X takitrde nim,

Nzrniglcngr kadol ngrdeng

X nzrkawpx-kzng.

Nim blz kx nznibqng.

Mepyr ngrm yrleo.

Xpetrle leplz neng Gct.

Leplz lēng nzprpxmōng mz nou, natq, drtc', x

✧ 5:5 Nou 49:9; Asaea 11:1, 10 ✧ 5:6 Asaea 53:7; Sekaraea 3:9; 4:10 ✧ 5:8 Sam 141:2

Neidu amrlx mz nrlc. ✧

“Nim kx rvzmimqng leplz lcng amrlx,
 Nidr kxnzprpxmqng
 Mz nou, natq, x neidu, x drtc' amrlx
 Mrka mz nrlc tulvzo,
 Murde nangini-ngrdr
 Pris neng Gct rgu,
 Mz nzwztr-krbzlr bade.
 X nidr kx na-aclveng ncdr mz nrlc,
 Mz nrlc tulvzo, eu.” ✧

¹¹ Zbz obq-mopwc' x xlrz nzngrkr siu ngr zbo
 ngr enjrl kx rblx nzrlwxngr. X enjrl lcng nzyrlwr-
 ngalelvzlr tron, mrkc nzmnc-kzng kxnzung kcng
 pwx x kxnzaclveng kcng. ✧ ¹² X natr kc tqetupe
 mz nzngrngr kx,
 “Nimq Nei Sip kc tznibq,
 X takitrde nim
 Nzrpiwxngr zmatq ngrmq,
 Nzkrz-angidr-krm,
 Kx nim angidr bcnyr, x xplr-esz'ngrn.
 X takitrde nim kz
 Nzrglqlzng, nzangiongr,
 X nzrglqpxngr zvz.”

¹³ Zbz xlr-moux krkcng lu amrlx, kxmule-
 esz' Heven, mz nrlc, mrnyz mqngr kxnzbzpeng,
 prla, x nrlc atwrnrngr, a' nzngrpx-lxblr-ngrdr mz
 nzrpi-krdr kx,
 “Kxetu rgr, kc tqngi Nei Sipq,
 X Gct kc tqwxbuom mz tron,
 Naglqpxkr nimu, na-amatqkr nimu,

✧ 5:9-10 Sam 33:3; 98:1; Asaea 42:10 ✧ 5:9-10 Nzrlaszng 19:6

✧ 5:11 Daniel 7:10

Na-awi-ngrbzkzr bamu.
 X napipxkr zmatq ngrmu
 Kx myalz-esz'ngr.
 Me tutr-ngrde lape!
 Na-angiokr nimu, naglqlzkr nimu,
 Tqvzpe tqvzpe! Eu!”

¹⁴ X kxnzlung kcng pwx nzrpibzlr kx, “Eu, angida!” X kxnzacvleng kcng nzrtco-lzbqng mz nzungiongr.

6

Hcsi Kxprki Drtwr Ngrde Nzaovxiongr

¹ Zbz mcx Nei Sip nzrniglc-krde kadol ngr skrol kc kai. X xlrz nznexpx-zlwzkr kxnzlung kc kai, x nate etu apule bzlrmei, rpile kx, “Vzm!”

² Obq-mopwc', x mcx kc hcsi kxprki, x mrlx kc tqwxbuom elr rmale popz' x nipna, x nzalaobz kc kraon mz narde. ✧ Nzwxbuo-krmlc kc mz hcsi apule ncblo kx aovxiope mz nzvecngr x naprpx mou mz nzaovxiongr mz kzdq kz nzvecngr.

Hcsi Kxpc Drtwr Ngrde Nzvecngr

³ Zbz mc-moux Nei Sip kc nzrniglc-krde kadol krali, x xlr-kzx kxlu krali nzrpi-krde kx, “Vzm!”

⁴ Zbz vzpx-mop kc hcsi kxpc. Mrlx kc tqwxbuom elr nzkabz kc bade toki r vea kxetu x zmatq ngr nzrkatz-krde nrwz mz nrlc, murde na-apqtrpzle drtwr leplz mz nzota-krdr x nznibq-lzbq-krdr.

Hcsi Kxbotapz' Drtwr Ngrde Nztaokr Dzbi

⁵ Zbz Nei Sip kc niglc-kzle kadol kratq. X kxlu kratq rpi-kzle kx, “Vzm!” Obqbo x mcx vzpxm kc

✧ 6:2 Sekaraea 1:8; 6:2-6

hcsi kxbotapz'. ✧ X ncblo kc tqvone elr adole mz mqde kc skel mz nzpipx-krde narncbr ngr dakxnzng. ⁶ Zbz xlrz kc natq vzpxm mz mzlir kxnzlung kcng pwx, rpibzle mz ncblo lc kx, “Rlr-ngrbo bam nzyrlq-krm narncbr kxlqlwx zlwz mz bxli r flawa wit kxes' o bxli r raes kxtq, murde vea kcng mz nrlc nzayctxdr nzpengr dakxnzng. A' bzkq odatiq nounc olivi x nqvi lr grep!”

Hcsi Kxkupaya Drtwr Ngrde Nzbzng

⁷ Zbz Nei Sip sc tqniglcp-kzle kadol krapwx, x xlrbo kxlu krapwx rpi-kzle kx, “Vzm!” ⁸ Obqbo, x mcx vzpxm kzdq hcsi kxkupaya. ✧ X mrlx kc tqwxbuom elr, drtqde ‘Nzbzng.’ X mrlx kx drtqde ‘Mrnyz Mqngr Kxnzbzpeng’ vzbz mz nibrde. Gct rlr-ngrbzle badr zmatq ngr nznibqti-krdr leplz kxkqlu ngr nrlc mz vea, mz dzbi, mz zyagox, x mz animol kzpetong.

Nznibqkr Kxnzrlxngiting

⁹ Zbz niglc kz Nei Sip kc kadol kranzlvqn. Obqbo x mcx kc olta. X mz nabz olta lcde, mcx mqngr leplz kcng tznibq-ngrdr nzrpipx-krdr Nrpa ngr Jisz. ¹⁰ X etumi natqdr nzrpi-krdr kx, “Yawe kc tqrninr, tr-esz'ngrn, x yrlq-angidrq natqm. ?Memule tqasa-ngrn nzayrplapx-krm lr nrlc kcng tznibqtilr nigr?” ¹¹ Mz nibrde sc tzataplxsrpeng lrpz kxprki, x nzrpibz badr kx, “Mzlemung kcng tzwztr-kzpzng mz Kxetu, sc tznibqtibeng nidr, da kc tzwaisr-ngrdr nimu mzli kc. A' aenzlipwzmu ena, murde trkrlzkapzle me nangi bz ngr leplz kcng nanibqng.”

✧ 6:5 Sekaraea 1:8; 6:2-6

✧ 6:8 Sekaraea 1:8; 6:2-6; Esikel

Zngya Ngr Drtwr Gct Krlzbzle Nrlc Tulvzo

¹² Zbz mc-moux Nei Sip kc nznriglc-krde kadol kraesz'mz. X vzm kc nengq kxetu, x nepi botapz' x temz pctx atwrnrngr apule mepyr. ✧ ¹³ X vri ngr bongavz nztatio-lxblrng mz drtc', nzapulr nra nc kxpo kc tqrlxom mz nzayclwztikr nenq kxetu nrladrng. ✧ ¹⁴ X bongavz kz nzmrbr-krde apule nqni kc tzbutr x sc tzkatxpe. X newz badr trmctu amrlx nzaprszpxng nidr me nzwxbu-ngrdrng. ¹⁵ X leplz kxtrnzrlxngitiung amrlx mz nrlc, kxmule-esz' king amrlx, kxnzetung, kxn-zaclveng ncblo ngr vea, bcnyrng, kxnzrngiscng zmatq badr leplz txneng, kxnzawz-nrbalqng, x kxdrtqdr opxng, leplz lcng amrlx sa namnc-kapqpxmqng mz butqbr x mz nabz newz. ✧ ¹⁶ X sa nanemi-lzbzlr mz newzng x butqbrng, mz nzrpi-krdr kx, "Talvzom nigr, x amnc-kapqbz nigr mz mz Kxetu kc tqwxbuom mz tron x mz zngya ngr drtwr Nei Sip. ✧ ¹⁷ Murde mzli ka sc tqkrlzpebzle Mzli Kxmatq nyz Gct ncdr Nei Sip, x trpnzng kx narlapx mz nzayrplapx-krdr nigr." ✧

7

Leplz Ne Gct Kcng Siu-trtqki-esz'-nzpnu-pwx-nrade-pwx (144,000) Narlapxng

¹ Zbz obq-rmwible-moux, x mcx enjrl nzp-wxng taplxsr bute' ngr nrlc, nzrpwa'-ngrdr nenq kcng pwx mz nrlc, murde nenq ma tqwq mz

✧ **6:12** Nzaelwapxngr 11:13; 16:18; Asaea 13:10; Joel 2:10, 31; 3:15; Matiu 24:29 ✧ **6:13** Asaea 34:4 ✧ **6:15** Asaea 2:19-21 ✧ **6:16** Hosia 10:8; Luk 23:30 ✧ **6:17** Joel 2:11; Malakai 3:2

drtc', nounc, x prla. ☆ ² Zbz mc-kzx kzdq kz enjrl vzdzm Heven vzkimle me prkilzm nepi. X malele kc da kx nayrlq-ngrbz r kx mz leplz, nzaelwapxngr kx nzngineng Gct kc tqngi nou nzlungr. X etumibz nate nzqle-krbzle mz enjrl kcng pwx tqrka-neba Gct zmatq ngr nzodatingr drtc' x prla. ³ Rpibz enjrl kc kx, "Bzkq odatiamu ena drtc', prla, x nounc, nakrlz-zpwxbzle nzyrkrpxkr nzryrlq-krbzkr r kx ngr Gct rgu mz rtrlmz kxnzawz-nrbalq nedeng." ⁴ X nzpim bange me nakrlzbz nzqqlukr leplz ne Gct kcng nartwzng r kx ngrde. Kxn-zlxngiting kcng tzprpxmqng mz neidu lr Israel nakrlzbzle siu-trtqki-esz'-nznpu-pwx-nrade-pwx (144,000). ⁵⁻⁸ Leplz lcng siu-trtqki-esz'-nznpu-pwx-nrade-pwx (144,000) taplxsr neidu lr leplz kcng Israel nznpu-esz'-nrade-li (12). Murde neidu lcng amrlx nzrngine-lxblrng siu-nznpu-esz'-nrade-li (12,000) kx nzrtwzng r kx ngr Gct. Drtq neidu lcng nidr seleng,

Judz	Simion
Ruben	Livae
Gad	Isaka
Asz	Sebyulon
Naftzli	Josip
Manase	Benjamin

Zbo Ngr Leplz Kxetu Neng Gct

⁹ Mz nibrde, obq-rmwible-moux, x mcx kc zbo ngr leplz kxetu-esz'ngr. Nzqqlu-zlwzng x

☆ **7:1** Jeremaea 49:36; Daniel 7:2; Sekaraea 6:5

trpnzngnr kx yatrpx nzrlwxngnr. Nzprpxmqng mz nou, natq, neidu, x drtc' amrlx mz nrlc. Nztutrpeng mrkc tqxlvrkipx Nei Sip mz tron. Nzkq-lxblrng lrpz kxprki x nzrmale-lxblrng nabx nc paam mz nzabrtz-krdr. ¹⁰ Zbz sc tzetumipe natqdr nzirpi-krdr kx, “Nzarlapxngnr vzpxm mz Gct rgr kc tqwxbuom mz tron, nimu ncdr Nei Sip.” ¹¹ Zbz enjrl kcng amrlx tztu-ngalelvzlr tron mrkc tzmncng kxnzaclveng kcng x kxnzung kcng pwx, sc tztco-lzbqng mrkc tqxlvrkipx tron mz nzangio-krdr Gct. ¹² Nzrpilr kx, “Eu, angida! Angiokr nim, awibzkr bam, glqlzkr nim, x amatqkr nim. Pipxkr nzyrplapx-krm, nzxplr-krm, x zmatq ngrm, tqyc tqyc. Eu, angida!”

¹³ Zbz kzdq kxnzaclveng kcng rpimle bange kx, “?Neke lcng tzkqng lrpz kxprki, x nzvzkimlr drlve?” ¹⁴ A' ayzlu-ngrbo natqde kx, “Kxetu, nim kx rkrlz.” X rpi-mople bange kx, “Krlcng leplz kx nzvzpxmqng mz Mzli r Nzkxpungr Kxtrka-zlwz. X mzli ka nztapzopelr lrpzdr mz mepyr ngr Nei Sip, murde naprkitxpxpeng. ✧ ¹⁵ Delc tztutr-ngrbzlr mrlc tqxlvrkipx tron nyz Gct mz nzangio-krdr nide mz Mangr-nzangiongr nyzde Heven, ngrlx x mz nrlckxbq. X Gct kc tqwxbuom mz tron, sa namnc-zvzng badr mz nzaclve-krde nidr. ¹⁶ X trtxpengr nzbtrale-krdr x nzbrlxkzkr drtwrdr, x trtxpengr nrkrdrtdr nzyrlxkr nzulr nepi, nyr x kzdung kz da.” ✧ ¹⁷ Murde Nei Sip kc tqtavau mrkc tqxlvrkipx tron, sa na-clvele nidr na-apule ncblo kxaclvele sip nedeng x namailzle nidr mz aulz ngr lue ngr nzlungr.

X Gct sa naycpqpxbzle drlemztr amrlx, murde naesakingr nzvzkr drtwrdr. ✧

8

Nzrniglckr Nei Sip Kadol Krarlimz

¹ Mzli kc tqniglcngr Nei Sip kc kadol krarlimz, lr Heven amrlx nzmnc-nabutxng mzli kxpipz trkrzlpwzleu nabz-nepi kxesz'. ² Zbz mcx nar enjrl kcng rlimz tztutrpzng mrkc tqlxlvkipx Gct, x nzkabz badr trpu rlimz.

³ X kzdq mou enjrl vzm tutr mz olta kc tzwzng mzm gol, tqtutrpz mrkc tqlxlvkipx tron. X malele kc baol kx ngi gol, kx nayclz-ngrm bqlr nc ninz kxngc. X nzka-mopwz bade kcng bqlr nc ninz, kx nakamibzle nzkrka'kr leplz ne Gct amrlx mz olta. ✧ ⁴ X mz nzglalzkr enjrl kc baol ngr bqlr nc ninz kc, zikapu ngr bqlr nc ninz kxmrte mrlz sc tqvzmilz lxbler nzkrka'kr leplz neng Gct, vzdz x krlzlbzle Gct. ⁵ Mz nibrde enjrl kc glaole kc baol ngr bqlr nc ninz kc, tekatrle mz nyr ngr olta x rtco-ngrde mz nrlc. X mzli lcdepwz bzlrpc tqpctipx, bzlrmei tqyrputipx x nrlc tqycngrlr atwrnrngr mz nengq. ✧

Trpu Kc Kai Drtwr Ngrde Nzatrkingr Drtc'

⁶ Zbz enjrl kcng rlimz tzrtaplxsrng trpu, sc tzoliqpeng nzvxu-krdrleng.

⁷ Mzli kc enjrl kc kai tqvxutrle kc trpu nede, muli-aes x nyr rlxlvzmi mepyr nzrtco-ngrm mz drtc' apule tewa kxdc. Mz nzmu-krde lcde, nctq drtc'

✧ **7:17** Sam 23:1-2; Esikel 34:23; Asaea 25:8 ✧ **8:3** Emos 9:1; Nzrlaszng 30:1, 3 ✧ **8:5** Livae 16:2; Esikel 10:2; Nzrlaszng 19:16

kxetu, vzmi nounc x nabr yrkrtxo mz nyr amrlx.

☆

Trpu Krali Drtwr Ngrde Nzatrkingr Prla

⁸ Zbz enjrl krali vxutrle trpu nede, x kzdq da kx apule newz kxetu kxngc nzrtcongr prla. X nctq prla kxetu nzlrtipxlr mepyr. ⁹ X dalr nctq prla lc amrlx nzbzting x lcsu amrlx mz prla lc nzodating. ☆

Trpu Kratq Drtwr Ngrde Nzatrkingr Lue

¹⁰ Zbz enjrl kratq vxutr-kzle trpu nede. X vri kxetu taom mz bongavz apuneomle kx ngxlu, x tao mz nctq lue kxkqlu, x aulz kxkqlu. ☆ ¹¹ X drtq vri lcde 'Kxpiz,' murde apule lue lr nc rtc kxpiz. X lue kxkqlu lcng nilwzdr piz, x leplz nzkqlung kx nzbz-ngrdr nzrmnq-krdr lue lcng tqpiz. ☆

Trpu Krapwx Drtwr Ngrde Nzatrkingr Dalr Bongavz

¹² Zbz enjrl krapwx vxutr-kzle trpu nede. X nctq nepi, temz x vri nzatrking amrlx, murde ncte lcng nabzting. Mz nzmukrde lcde, kzdq nctq ngrlx tryzlr-ngru, x kxmule lcpwz mz nrlckxbq. ☆

¹³ Mz nibrde obq-mopwc' x mcx nzlvctxlzkr kzdq lr mrkc wq, x sc tqnemipele nzrpi-krde kx, "Nimu lr nrlc na-aclvetioamu. Murde mzli kc enjrl kcng tq navxutr-mou-ngrrdr trpu nedr, nzayrplapxngr kxtrka-esz'ngr lang tq sa navz-kzpzng bamu."

☆ **8:7** Nzrlaszng 9:23-25; Asaea 28:2; Esikel 38:22 ☆ **8:9**

Sekaraea 13:8-9 ☆ **8:10** Asaea 14:12 ☆ **8:11** Jeremaea 9:15

☆ **8:12** Asaea 13:10; Esikel 32:7; Joel 2:10, 31; 3:15

9

Trpu Kranzlvqn Drtwr Ngrde Nzatrkatigr Leplz

¹ Zbz enjrl kranzlvqn kc tqvxutrpele trpu nede. X mcx kzdq vri kx taopem Heven mz nrlc. Nzcabz mz vri lc tqtaom kc ki kx nalvxlz-ngrde naonrx ngr gq kc trpnzngnr noude. ² Kx lvxlzle kc gq kc, zsikapu kxbotapz' mapunelzmlc apule zsikapu ngr trmami, x amrbrtxde zyzlr ngr nepi, x awx-nzlo-atwrnr-ngrde bongavz. ✧ ³ X vzpxm mz zsikapu kc kionabr nzyrkromqng mz nrlc. X nzkabz badr zmatq ngr nzrtq-krdr leplz apupwzle nalx. ✧ ⁴ Nzpibz badr kx bzkq nzatrkatilr nabr, nounc, x lxbi. A' nzrlrtx-ngrpwz badr nzatrkatikrdr leplz kcng rkx ngr Gct tryctru mz rtrlrnztr. ✧ ⁵ Trnzrlr-ngrpwzu mz kionabr lcng nznibq-krdr leplz, a' nzaetq-zlwz-ngrbzlr drtqdr mz temz kxnlvqn. X zvetq kxetu lc na-apule zvetq ngr nzrtqkr nalx. ⁶ Mz nabz temz lcng nzlvqn, leplz kcng drtqdr tqetq sa nartangrtilr kzdq da kx nabz-ngrdr, a' trtxpnzngnr nzmctikrdrle. X nzsutitx zlwz drtwrdr nzbzngnr, a' trtxpnzngnr nzbz-krdr. ✧

⁷ Mc-kzx kionabr lcng nzapulr hcsi kx nzoliqng mz nzvo-krdr mz vea. X nardr lao-lxblr-ngrm da kx apule kraon kx ngi gol, x nardr apule nar ncblo. ✧ ⁸ Nqnginaradr boi apule nqnginar olvz, x nqngidr malc apule nqngi laion. ⁹ X nzkq-ngrdr temz ngr lomrdr da kx nzwzngnr mz aian kc tqyrputrngr nipna. X natq nzyrklzkr nabxdr apule natq sariot kcng tzvomi-ani-tpwzlr hcsi

✧ **9:2** Nou 19:28 ✧ **9:3** Nzrlaszngnr 10:12-15 ✧ **9:4** Esikel 9:4

✧ **9:6** Job 3:21; Jeremaea 8:3 ✧ **9:7** Joel 1:6; 2:4-5

mz nzvecngr. ¹⁰ X dxpa' krdr kcng tqtutr mz nqglqdr nzapulr dxpa' kr nalx. X mz dxpa' krdr dekc tqyctrngr zmatq ngr nzrtq-krdr leplz mz temz kxnzlvqn. ¹¹ Nzrningeng king kx aclvele nidr, krlcde enjrl kc tqngi kxetu r gq kc trpnzngr noude. X drtqde mz lr Jiu *Abadon*, x drtqde mz lr Grik *Apolion*, drtwr ngrde *Kxoda*.

¹² Nzayrplapxngr kxtrka-esz'ngr kc kai, dela tqyrkrpxpe. A' nzayrplapxngr kxtrka-esz'ngr li lang tzvzbepqng.

Trpu Kraesz'mz Drtwr Ngrde Nzrnibqngr Leplz

¹³ Enjrl kraesz'mz vxutrle trpu nede. X xlrx kc natq vzxpm mz nctq bute' kcng pwx mz olta kc tqngi gol tqtu mrkc tqxlvrkipx Gct. ✧

¹⁴ Rpibzle mz enjrl kraesz'mz kx, "Aopxpebz drtq Enjrl kcng pwx tzatolvangr mz lue kc etu drtqde Yufretis, mzli ka." ¹⁵ Zbz sc tqaopxpebzle drtq enjrl kcng pwx, murde nanibqtilr nctq leplz kxetu mz nrlc. Enjrl lcng nzaenzli-ngrdr nabz nepi, zbq, temz, x yiz lcdepwz murde na-atutr-ngrdr nzwz-krdr lc. ¹⁶ X nzpim bange leplz ngr ami kxnzvo mz hcsi krlzbzle obu-trtqki-li (200 milion). ¹⁷ X mz nzobq-krnge opx mz mzke' hcsi kcng, x kxnzwxbuomqng badr. Nzqk-ngrdr temz ngr lomrdr da kx nzwznggr mz aian, pc apule nyr, blu apule zsikapu, x plc apule rplz salfz. Nar hcsi kcng nzapulr nar laion x naodrng tqrpnapx-ngrm nyr, zsikapu x salfz kxngc. *

✧ **9:13** Nzrlasznggr 30:1-3 * **9:17** Mz Nzryrngrkxtr mzli kang kqlu rplz salfz drtwr ngrde nzodatingr mz nzayrplapxkr Gct leplz. Mc Sam 11:6, Asaea 30:33; 34:9, Esikel 38:2 x Nzaelwapxngr 9:17; 14:10; 19:20; 20:10 x 21:8.

18 Mz nzayrplapxngr lcng tq, nyr, zikapu x salfz kxngc kcng tzrpnaxm mz naodr, nznibqtilr leplz kxnzkqlung mz nrlc. 19 Hcsi lcng mrkc tqmalcnepx mz nqglqdr apule nar ningidoe, x nzrmakx-ngdrdr leplz. Mz nzmukrde lcde, zmatq ngr nzaetq-krdr drtq leplz yctr mz naodr x nqglqdr kz.

20 A' leplz amrlx kcng trnzbzung mz nzayrplapxngr lcng, tresakiu nzangio-krdr drka' x mqngr drka' kxnzlx kx nzwzngz mz gol, silvz, bras, rplz x dapunc. X da lcng amrlx trpnzngz da kx nzmclr x nzxlrir, x trnzvzne-kzung. A' trnzaxtxlru da lcng tzwz-ngdrdr mz mqdr. ✧ 21 X trnzaxtx-kzlru nznribq-krdr, nzymne-krbzlr mz drka', nzrmwimi-krdr doa kx trngiu krnalzdr, x nzpnangz da.

10

Skrol Kxtpwz

1 Zbz obq-rmwible-moux, x mcx kc enjrl kxmatq vzom Heven. Ngrlelvz dcbz apule lrpz kx kq-ngrde, x narde ngrlelvz nrpc'. Mzte luli apule nepi, x nanycde nzapulr nctrpou kx ngc-zli nyr. 2 Enjrl lc malele kc skrol kxnzyr kx nzkawpxpex. Nanycde kxrte atuole prla x kxmc atuole mz drtc'. 3 X yrlqbzle kc natqde kxetu, kx apule nzklwzkr laion kxetu. Zbz xlrzlx kc natq Heven, apule bzlrmei kxetu x ayzlu-ngrbzle natq enjrl nzwrde rlimz. 4 Mzli kc tqayzlu-ngrbzle natqde, sc tqoliqtipez nzryrongz natqde kcng rlimz. A'

✧ 9:20 Sam 115:4-7; 135:15-17; Daniel 5:23

mzli lcdepwz, kzdq natq Heven rpiomle kx, “Yrlq-kapq natq kcng rlimz, bzkq yroq.”

⁵ Zbz enjrl kc nanycde tqtuó kc prla x tuo kc mz drtc', glalzle mqde kxrte Heven. ✧ ⁶ X esalz-ngerde drtq Gct kc nzlu-krde tqyc tqyc, x tqwz-ngerde bongavz, drtc', prla, x da kznikeng amrlx ycpxmng elr. ✧ X sc tqrppe enjrl lcde kx, “Mzli r nzaenzlingr yrkrpxpe. ⁷ Murde mzli kc enjrl krarlimz navxutr-ngerde trpu nede, drtwr Gct kx yc-kapq kc tqpipx-pnzbzle mz profet nedeng kcng tzwztrpzng bade, sa natutrpe.”

⁸ X nide kc tqycmneom Heven, xlr-moux nate, rpimle bange kx, “Vz x rtrngztibz skrol kc tzkawpx mz mq enjrl kc nanycde tqtuó kc prla x kzdq tqtuó mz drtc'.” ✧ ⁹ X vzbo mz enjrl kc, sc tqrlxtipebo skrol kc topwz. Rpimle bange kx, “Twx x ngq. Sa naxngibzme mz naom nilwzde nzmrlz-krde apule hane. A' mzli kc navzope-ngerde mz nelzm, nelzm kc tqrlvqkrkxpe.” ¹⁰ Rtrngztibo skrol kc topwz mz mqde. Sc tqngqpex, x da zpwx, nzmrlzkr nilwzde mz naonge apule hane. A' mz nibr nzlwzo-krngele, nelznge kc tqrlvqkrkxpe. ¹¹ Zbz sc tzrppe-mop bange kx, “Napipx-mouq natq Gct lcng tqycmnetr-ngerde drtc', leplz, natq x king kang kqlu.”

11

Profet Ne Gct Kcng Li

✧ **10:5** Nzrlaszng 20:11; Lou Kcpwz 32:40; Daniel 12:7; Emos 3:7 ✧ **10:6** Nzrlaszng 20:11 ✧ **10:8** Esikel 2:8—3:3

1 Zbz, mz nibrde nzkam kc bange neni kxboi apule dapunc ngr nzanengr, x nzrprim bange kx, “Tulzm, x vz mz nzanengr Mangr-nzangiongr Yawe x olta ngrde, x rlwx leplz kcng tzan-giopxmqng elr. ☆ 2 A' yrlqtxpx nrlarde makoa kcng yz, bzkq aneqng, murde nzkapbez mz leplz kxtrnzrlxngitiung kcng narnzlvzolzr Jerusalem, navz nakrlzbbzle yiz tq x ncte kc. ☆ 3 Sa natwzlr-ngrbo profet nenge kcng li tzpxing lrpz ngr nzvzkr drtwr. X sa nayapwxtipxlr natq Gct mz nabz yiz tq x ncte kc.” *

4 Profet lcng li nzapulr nounc olivi kcng li, x da li kcng nzwxbuo-ngrm lam, tqtutr mrkc tqxlvrkipx Gct, Kxetu kc tqaclvele nrlc. ☆

5 Nzmu kzdq doa rpile na-atrkatile nidr, nyr sa navzpxm mz naodr mz nzodati-krde nide. X kxnamu-kzle lc nzbzkr doa kznike rpile na-atrkatile nidr. 6 X nzrngiscng zmatq ngr nzrpwa'-krbzlr mz bongavz nzdckr tewa, murde tewa ma tqdc mzli lc tzryapwpxpx-ngrdr natq Gct, mz yiz lcng tq x ncte kc. X nzrngisc-kzng zmatq ngr nzale-krdr lue nzlrtipx-krdr mepyr, x zmatq ngr nzatrkatikrdr lr nrlc mz zyagox kznikeng nasuti drtwrdrlc. ☆

☆ **11:1** Esikel 40:3; 42:20; Sekaraea 2:1-2 ☆ **11:2** Luk 21:24

* **11:3** 11:2 Mz nzplzpxkr Jon zbz lcng, kzdu mzli pipxle yiz tq x ncte kc, kzdu mzli pipxle temz nzpnu-pwx-nrade-li (42), x kzdu mzli pipxle zbz kcng siu-esz'-trtqki-li-nzpnu-esz'mz (1,260). A' yro-txpwzkr ‘yiz tq x ncte kc,’ murde drtwr ngr mzli lcng tq kx namu-txpwzlr esz'. Mc kz Nzaelwapxngr 11:6, 12:6, 14, 13:5.

☆ **11:4** Sekaraea 4:1-14 ☆ **11:6** 1 King 17:1; Nzrlaszng 7:14-21; 1 Samwel 4:8; Luk 4:25; Jemes 5:17

⁷ Mzli kc tqyrkrpxpengr profet lcng nzyapwxti-krdr natq Gct, Mrlx Kc Tqdrka'ngr tqdwalzm mz gq kc trpnzngr noude, sa naotang badr. Sa na-aovxiole nidr x nanibqleng. ✧ ⁸ X namz ngrdr sa nayrbqtxng mz lrpzki kx nzvzk-itr leplz kxkqlu mzteadau Jerusalem, mrkc tzqvlvztrngr Kxetu rdr mz kros. Mzteadau lc nzymne-ebzpxngr drtq 'Sodom' o 'Ijpt,' murde lr Jerusalem trnzlxngiti-kzlru profet ne Gct da kc tzwai lr Sodom x lr Ijpt trnzrlxngiti-krdr. ✧ ⁹ Zbz leplz ngr nou, natq, neidu, x drtc' amrlx naobqlvzolzr namz ngrdr, zbq natq x ncte kc. X trnarlrpx-ngrdru nzryrtzmqngz namz ngrdr. ¹⁰ X lr nrlc sa na-abrtz-zlwz-ngzdr nzxlr-krdr nzbzkr profet lcng nzling. X sa nartrngzbnz nzmungz x narka-etrng da, murde profet lcng nzling kc tzaetqbzlr drtq lr nrlc.

¹¹ Mz nibr nzyrbqtikr namz ngrdr zbq tq x ncte kc, Gct sa na-atulz-mople nidr mz nzbzngr mz nzvxutr-krbzle nzlu-krde badr. X kx namc leplz kxnzkqlung nztulz-mou-krmlr mz nzbzkrdr, namwxlr-zlwz-ngzdr. ✧ ¹² X mz nibrde, sa naxlrz profet kcng nzling Heven kzdq natq kxetu, narpiomle kx, "Vzdzmamu mrka!" X mzli lcde, sa naobqlvzlngr leplz kcng tzmwati drtwrdr nidr, nzvzdz-krdr Heven mz nabz dcbz. ✧ ¹³ X mzli lcpwz, nengq kxetu sa navz-kzp mz nzodati-krde kzdq nctq Jerusalem x nabznz mz nengq lcde leplz siu-rlimz (7,000). X leplz kcng tzlu-tpwzng namwxlr-zlwzng x nagqlzlr Gct kc

✧ **11:7** Daniel 7:7, 21; Nzaelwapxngr 13:5-7; 17:8 ✧ **11:8** Asaea 1:9-10 ✧ **11:11** Esikel 37:5-14 ✧ **11:12** 2 King 2:11

Heven.

¹⁴ Nzayrplapxngr kxtrka-esz'ngr krali delc tqka-pupxpe, a' se tqvz-nqblqpe-kzp nzayrplapxngr kxtrka-esz'ngr kratq.

Trpu Krarlimz Drtwr Ngrde Nzacive-angidrkr Gct Nrlc

¹⁵ Zbz enjrl krarlimz kx vxutrle kc trpu nede, kzdung natq kxetung Heven nzrpilr kx, “Zmatq ngr nznginingr King mz nrlc ycbz mz Kxetu Gct rgu ncdr Kxnzmcpz nede. X Gct sa tqacive mzli ka x nzacive-krde tqyc tqyc!” ✧ ¹⁶ Zbz kxnzaciveng kcngr nzpnu-li-nrade-pwx (24) tzwxbuong mz tron mrkc tqxlvrkipx Gct, nzrtco-lzbqng mz drtc', x nzangiolr Gct. ¹⁷⁻¹⁸ Nzrpilr kx,

“Kxetu rgr, Gct kc tqrninr,
Kc tqmnc mzli ka,
X tqmnc pnz. Awi-ngrbzkzr bam,
Nztwzpe-krm zmatq ngrm,
X nipem King r nrlc ka.
A' lr mrkzbleng ngyati
Drtwrdr nimq murde
Nzkaputr-krm mzli r nzayzlu-krbzme
Da mz leplz kxnzbzpeng.

“X mzli r nzrka-krbzme
Da kxmrlz mz profet
Kcng tzwztrpzng bam, badr leplz nemqng
Amrlx kcng tzamrluelr nim,
Kxmule-esz' kxnzetung o leplz txneng.
X krlzpe-kzpzle mzlr
Nzrmiltxo-krm

✧ **11:15** Nzrlaszngzr 15:18; Daniel 2:44; 7:14, 27; Asaea 9:7

Krkcng tznibqtilr

Leplz nemqng mz nrlc ka.” ✧

¹⁹ Zbz Mrkc Tqtr Mangr-nzangiongr Gct Heven nzlvxpx, x Bokis kc Tqyclz-ngrm Nzesz'tikr Drtwrdr Badr Leplz Nedeng, sc tzmcpce elr. Mzli lcde bzlrpc tqpctipx, bzlrmei tqyrputipx, nrlc ycnglr atwrnrngr mz nengq, x muli-aes kxetuting tqvztiom apule tewa kxdc. ✧

12

Olvz Kc Tqngi Israel X Doa Nede Kc Tqngi Mevalu

¹ Zbz kzdq rkk kxmatq prpxm mz bongavz. X mcx kc olvz kq lrpz kx apule nepi, x tuo-ngrmle temz x ngrlelvzle narde vri nzpnu-esz'-nrade-li (12) apule kraon ngr narde. ² Olvz lc yr x tangqgx mz nzetqtikr drtqde nzrmika-krde.

³ Zbz kzdq rkk kxmatq prpx-mop mz bongavz. Krlcde mepwz kxpc kxetu, narde rlimz, taplxsr kraon kxtpwzting, x scde dxpa' kxetu nzpnu-esz'. ✧ ⁴ Mepwz lcde nqglqde iplro-ngrmle vri ngr bongavz kxznkqlung mrka mz drtc'. X vzbz mz olvz kc, sc tqtu-pz'litrpebzle doa kc namikale, murde nangqde. ✧ ⁵ Olvz kc rmika x nede doa ncblo. A' doa ne olvz kc trngqu Mepwz kc murde nzglqlz-rlrubz mz Gct mrkc tqwxbu-ngrde mz tron. Nide kc na-aclvele leplzng amrlx mz zmatq kx xplr-esz'ngr, *na-apule bz kc tqrniglc botol*. ✧

⁶ X olvz kc sc tqdwatrape lzke, me oliqtibz Gct mz nzmncpx-krmle elr mz yiz kcng tq x ncte kc. ✧

✧ **11:17-18** Sam 2:1-2; 110:5; 115:13 ✧ **11:19** Nzaelwapxng 8:5; 16:18, 21 ✧ **12:3** Daniel 7:7 ✧ **12:4** Daniel 8:10 ✧ **12:5** Sam 2:9; Asaea 66:7 ✧ **12:6** Nzaelwapxng 11:2

Enjrl Nzaovxiolr Drka' Neng Setzn

⁷ X vea kxetu kc tqprtze Heven, Narenjrl Maekol badr enjrl nedeng nzvecng badr Mepwz. X Mepwz badr enjrl nedeng nzotang badr. ☆

⁸⁻⁹ Mepwz kxetu kc tqngi kz ningidoe ngr nrlanc kc bqnc, tizrpi-kzpz 'Nar Drka' x 'Setzn.' Nide enqmi r leplz murde tqpiqle leplz x tqesabrtile leplz ngr nrlc atwrnrngr. Nzvecng x Mepwz badr enjrl nedeng sc tzaovxiopeng Maekol badr enjrl nedeng. X trnzrlrpe-ngrpwzu nzmnc-krdr mou Heven. Nzrtcmipxngr enjrl nedeng Heven x nztaomqng mz nrlc, mz nznigini-krdr drka'. ☆

¹⁰⁻¹² Mz nibrde, xlrk kc natq kxetu Heven, rpile kx, ☆

“Gct rgu sa na-arlapxle
 Leplz nedeng mzli ka.
 Sa natwzpele zmatq ngrde,
 X nangipe King mz nrlc.
 Kxnmcpz nede twzpele zmatq ngrde,
 X Setzn kc tqpiqtitr-
 Zvzbzle kztegunq
 Mz mz Gct rgu,
 Nzrtcpxpengr Heven.

“A' kztegunq nzaovxiopelr
 Nide mz zmatq ngr mepyr
 Ngr Nei Sip. X nimu lr Heven
 Na-abrtz-zlwzamu.
 A' nimu lr nrlc ka
 Na-aclvetoamu.
 Nar Drka' vzopebz bamu.

☆ **12:7** Daniel 10:13, 21; 12:1; Jud 9 ☆ **12:8-9** Nou 3:1; Luk 10:18 ☆ **12:10-12** Job 1:9-11; Sekaraea 3:1

Drtwrde ngya zlwz murde nzmnc-krde
Mrla mzli trnaboiu.”

*Mepwz Nzotang Badr Olvz Kc X Doa Nedeng
Amrlx*

¹³ Kx glxpe Mepwz kc nzrtco-ngrm nide mz nrlc, sc tqmaneutinepele lxede doa kc. ¹⁴ A' olvz kc lvctr-ngrde mrnyzde mrkc lzke nabx lr kxetu li kx nzkabz bade. X namncpx-ngrmle mrkc nakrlzbzle yiz kxtq x ncte kcng, murde namnc-rlrubz mz Mepwz kc. ☆ ¹⁵ Zbz Mepwz kc sc tqbyape-ngrbze lue kxkqlu mz nibr olvz kc, murde natwz nubla ngrde x trpnzngr nzrlapx-krde. ¹⁶ A' drtc' okatrle olvz kc. Amzpxle naode x mnqle nubla ngr lue kc tqbyapxngr Mepwz kc yrkrtxo. ¹⁷ Zbz Mepwz kc sc tqngyatipe drtwrde olvz kc, x sc tqvzpe mz nzvec-krdr badr kzdung kz doa nedeng, kcng tzvz-nqblqlr Loukxtr sc Gct, x tzlxngitilr natq angidr kcng tqpipx Jiszs.

13

*Mrlx Kc Tqdrka'ngr Kc Kai Tqngi Enqmi Kc Etu
Ngr Kraes*

¹ Zbz obq-rmwible-moux, x Mepwz sc tqtupe mepz prla tqaenzlipxpe. X mcx Mrlx Kc Tqdrka'ngr kx vzdzm prla. X nzyrtr-lxblrng mz narde rlimz drtq kx bletipx-lxblrng kx nzxtrnga-ngrdr Gct. X scde dxpa' nzpnu-esz', taplxsr kraon kxtpowz. ☆ ² Mrlx Kc Tqdrka'ngr tqmcx apule trputi kzpeto kxetu. Drkrvi ngr nanycde boi x malc apule drkrvi ngr nanyc kzdq kz animol kzpeto. X nzxplrkr naode apule nao laion x

☆ **12:14** Daniel 7:25; 12:7 ☆ **13:1** Daniel 7:3-25; 11:6

nqngide malc. X rngisc zxplr, kraon x zmatq kx aprcbz Mepwz bade. ³ Opxm kx kzdq nar Mrlx Kc Tqdrka'ngr lcde nzataki pnz x ycpwz pipz nzbz-krde. A' mztitrpe x bzmrde sc tqyctxtr alo. Kx nzmclr Mrlx Kc Tqdrka'ngr, lr nrlc amrlx nzkcitxpxlr x sc tzvz-nqblqpelr natqde. ⁴ X nzangio-kzlr Mrlx Kc Tqdrka'ngr, mz nzrpi-krdr kx, "Trpnzngr kx rtakitr nzxplrkr Mrlx Kc Tqdrka'ngr. X trpnzngr kx yatrpz mz nzota-krdr ncdr murde na-aovxiole nide." X nzangio-kzlr Mepwz murde nzaprc-krbzle zmatq mz Mrlx Kc Tqdrka'ngr. ⁵ Mrlx Kc Tqdrka'ngr napivxitirole Gct mz nzglqpx-lzbq-krde mz nzymne-krde. A' zmatq lc nzrlrtx-ngrpwzlrle bade yiz tq x ncte kc. ⁶ Sc tqpibqtipele x tqlcbqtipele Gct, drtqde, me mnc-ngrde x lr Heven amrlx. ⁷ Nzrlr-ngrbz bade nzota-krdr badr leplz neng Gct x na-aovxioleng. X kxnzvpzpxmqng mz nou, natq, neidu, x drtc' amrlx nzmnczlbzng mz zmatq ngrde. ⁸ Leplz mz nrlc tulvzo sa na-angiolr Mrlx Lc Tqdrka'ngr, krkcng drtqdr trnzyrou mz Buk ngr Nzlungr sc Nei Sip kc tznibq. A' kxnzrlxngiting kcng drtqdr tzyro elr abzo mzli kc tqwzng Gct nrlc, trtxpnzng Mrlx Lc Tqdrka'ngr. ✧ *

⁹ Abzamu nzyrlq-angidr-krmu natq lcng navzm. ¹⁰ doa kx pnzpe drtwr Gct napresin, sa napresin. X kx pnzpe drtwr Gct nanibq mz toki r vea, sa nanibq mz toki r vea. Mz nzmu-krde lcde, mzli kc naprtz-ngrbz da lcng bamu, tu-amqngiamu mz nzrlxngiti-krmu x abtrpzmu drtwrmu mz

✧ **13:8** Sam 69:28

* **13:8** Setzn mncpx-ngrmle Mrlx Kc

Tqdrka'ngr Kc Kai.

Gct. ☆

Mrlx Kc Tqdrka'ngr Krali Tqngi Profet Kxpokia

¹¹ Zbz mc-moux kzdq kz Mrlx Kxdrka'ngr kx vzdzm mz drtc'. Dxpaa' krde li kxtpwz apule dxpa' kr Nei Sip, a' nzymne-krde xplr apule nzymnekr mepwz. ¹² Mrlx Kc Tqdrka'ngr lc tutrpz mz krkc kai x zmatq ngrde apupwzle zmatq ngr krkc kai. X rtultr-ngrbzle mz lr nrlc amrlx nzangio-krdr Mrlx Kc Tqdrka'ngr kc kai tqyctrngr bzmr kxsqki. ¹³ Mrlx Lc Tqdrka'ngr krali, na-aletile rlx kxkqlu. Krlzle nzavzo-ngrm nyr bongavz mzli kc tzobqngr leplz kxkqlu. ¹⁴ Nzrlr-ngrbz mz Mrlx Kc Tqdrka'ngr krali nzaletkr-krbzle rlx mz mz Mrlx Kc Tqdrka'ngr kc kai. X mz nzale-krde rlx lcng, esabrti-ngrde leplz kxkqlu mz nrlc. Krkc Krali pibzle badr nzrlz-krdr mqngr Krkc Kai tzataki mz toki r vea a' sc tqlupe mou, murde leplz na-angiolr nide mz mqngr kxnzlx lc. ¹⁵ X nzrlr-ngrbz mz Mrlx Kc Tqdrka'ngr krali nzvxutr-krbzle mz nao mqngr Mrlx Kc Tqdrka'ngr kc kai tzlzl, murde naycmne, x nanibqtile leplz kcng trnzangiolru nide. ¹⁶ Mrlx Kc Tqdrka'ngr krali rtultr-ngrbzle mz leplz txneng, kxnzetung, bcnyrng, nra-nzlung, kxnzawz-nrbalqng x kx drtqdr opx nzyctrkr rlx mz mqdr kxrtc o mz rtrlmztr. ¹⁷ Trpnzngr kx naxpe x na-amwa da, kx tr-rtwzkale rlx lc tqngi drtq Mrlx Kc Tqdrka'ngr kc kai o nabz kx ngi rlx ngr drtqde. ¹⁸ X nabz lcde trtqki-esz'mz-nzpnuesz'mz-nrade-esz'mz (666). Doa kx drtwrde aotrangidrzbzle mz nabz lc, nide kx narmc drtwr ngr

☆ **13:10** Jeremaea 15:1; 43:11

nabz sc Mrlx Lc Tqdrka'ngr, murde ngi nabz sc kzdq ncblo. Drtwrmu na-aotr-angidrbzmu mz da lcong murde naglx-angidramu nide mzli kc navzm.

14

Kxnzrlapxpeng Sc Tzngrpe-ngrdr Kc Nabz Kxm-rna.

¹ Mz nibrde, obq-rmwible-moux, x mcx Nei Sip kc nztuo-krmle mz Newz Saeon kxmngi, nidr badr kxnzrlapxpeng kcng siu-trtqki-esz'-nzpnu-pwx-nrade-pwx (144,000). X drtq Nei Sip x drtq Trtede nzyrtr-pnzbz mz rtrlrmztr. ☆

² X xlrx kc nzngrngr Heven, nate etu-esz'ngr apule nzyrpukr nrc x bzlrmei. X nzngrngr lcde tqxlrx nzyrlvi-krde apu-kzle nzyrnkr nqvi r gita kxkqlu. ³ Leplz kcng siu-trtqki-esz'-nzpnu-pwx-nrade-pwx (144,000) nzngr-ngrdr kc nabz kxmna mrkc tqxlvrkipx Gct, badr kxnzung kcng pwx, x kxnzaclveng kcng nzpnu-li-nrade-pwx (24). Nabz lc tzngr-ngrdr trpnz-moungr kx ryatitr nzngrngr, a' ngi txpwx krkcng tzx-petrpeng mz lr nrlc. ⁴ Trnzvz-nqblqlru nqmq kr lr nrlc, a' nidr leplz kx nzalqti-lzbqng mz nzapu-krdr ncblo o olvz kxnzmnc-kamelr. X nzvz-nqblq-zvzlr Nei Sip drlve ke vzkile. Leplz lcong xpetrpeng Gct mz lr nrlc, murde nayrlqpx-bekang mz nzwztr-krbzlr mz Gct x Nei Sip, da kc tqwai nzyrlqpx-beka-ngrbz mz Gct x Nei Sip nra nounc kcng ayrrngr. ⁵ Trnzpokiaung x nqmq krdr tubqbz mz nzobqkr Gct. ☆

Nrpa Kxmrlz Tqycpe Tqycpe

⁶ Zbz mcx kc enjrl kx lvc mrkc wq mzlilxlr, x rlem nrpa kxmrlz kc tqycpe, tqycpe mz lr nrlc, x mz nou, natq, neidu, x drtc' amrlx. Nrpa lc nrpa ngr nzacive-angidrkr Gct. ⁷ X rpibzle mz nate kxetu mz leplz amrlx kx, “Amrlueamu Gct x glqpxamu nide, murde mzli r nzayzlu-krbzle da mz leplz dekape. Mzli lc sa nakabzle da kxmrlzting mz leplz kcng tztubq-esz'ngrng x sa na-ayrplapxle leplz kcng tzpctxpx-ngrdr nzyrlq-angidr-krdr natqde. Mz nzmu-krde lcde, na-angioamu Gct kc tqwz-ngrde bongavz, drtc', prla, x aulzng.”

⁸ Zbz mc-moux kc enjrl krali lvc-nqblqmlc enjrl kc kai, x rpilc kx, “Taon kc etu, apule Bxbilon kc bqnc, kc tqrngisc zmatq kx xplr, tzmilxtxo. Nzm-nckr lr Bxbilon trka. X nzangio-krdr drka' apule nzabeati-krdr nzrmwimingr, murde trnzngida-zpwxung mz nzangio-krdr Gct angidr. Leplz mz nrlc tulvzo nzaxvctr-lzbqzbzng mz alwx ngrdr x opxm kx alukurnr-ngrng waen. Mz nzmu-krde lcde, Gct sa na-ayrplapxle leplz lcng amrlx.” ✧

⁹⁻¹⁰ X mc-moux kc enjrl kratq lvc m mz nibr krkcng nzling. X etumi nate nzrpi-krde kx, “Doa kx angiole Mrlx Kc Tqdrka'ngr kc kai x mqngrde kc tzlz x nzyrtr-kzpz mz rtrlrmzte o mz mqde kxrtc rkx ngrde, sa na-ayrplapx Gct mz nztutr-krbzlr mz Nei Sip badr enjrl kxnmzatqng. Zngya ngr drtwrde sa naxplr-esz'ngr mz nzayrplapx-krde leplz lcng. Sa na-aetqti-zlwzbzle drtqdr x sa naodati-atwrnr-ngrng mz nyr kxpq-esz'ngr

✧ **14:8** Asaea 21:9; Jeremaea 51:8

ngr rplz salfz kxngc. ☆ 11 Trpnzngr nzyrkr-pxkr nzetqkr drtqdr, krkcng tzangioldr Mrlx Kc Tqdrka'ngr x mqngrde kc tzlz, x tztwzlr rlx ngr drtqde. Nzetqkr drtqdr vztz alo, ngrlx x mz nrlckxbq, murde zikapu ngr nzngckr nrkrdrtqdr tqvzpe tqvzpe.” ☆ 12 Drtwr ngrde kx nimu leplz neng Gct, kcng tzyrlq-angidrlr natqde x tzvz-nqblq-zvzlr Jiszs, na-abrtrpzmu drtwrmu bade mz nzaenzli-krmu, murde sa na-ale Gct nike pipxle.

13 Mz nibrde, xlr-moux kc natq Heven, rpimle bange kx, “Yro natq lcng. Abzope mzli ka, sa namrlzbz mz leplz kcng tznibqting murde nzlxngitilr Kxetu rgu.” Rpi Mqngrkxtr kx, “Eu, da angidrxt! Murde nzetqkr drtqdr kx vzpxm mz nzwztr-krbzlr mz Kraes sa nayrkrpxpe, x Gct sa narkabz badr nzmnc-zpwxngr x da kxmrlzting mz nzwztr-krbzlr bade, kxmule-esz' nike prtzbz badr.”

Nzayrlwr-lxblrngr Lr Nrlc Apule Nzrkqtrngr Nra Nounc

14 Mz nibrde, obq-rmwible-moux, x mcx kc dcbz kxprki. X mz dcbz lcde, wxbuom kc ncblo elr apule Jiszs, Mrlx Leplz. Laom mz narde kc kraon kx ngi gol x malele kc toki kxka x malc. ☆ 15 Zbz, mcx kc enjrl vzpxm Mangr-nzangiongr, x mz nate kxetu rpibzle mz ncblo kc tqwxbuom mz dcbz kx, “Mzli ka mzli r nzayrlwr-lxblrpengr leplz kxnmrlzng ngr nrlc,

☆ **14:9-10** Nou 19:24; Matiu 5:22; 8:12; 10:28; 13:42, 50; 18:9; 22:13; 24:51; 25:30; Mak 9:47-48; Luk 13:28; 16:24; Jud 7; Nzaelwapxngr 9:17; 19:20; 20:10; 21:8 ☆ **14:11** Asaea 34:8-10

☆ **14:14** Daniel 7:13

da kc tqwai nzrkqtrngr nra nounc kxnmrlz mz toki mzli kc nabrpe-ngrdr. Mz nzmu-krde lcde, ayrlwr lxblr leplz kxntubqng ngr nrlc.” ✧
 16 Zbz mrlx kc tqwxbuom mz dcbz yrlqbzle toki kxka scde mz nrlc, x leplz kxntubqng amrlx nzyrlwrtr-lxblr-pnzng.

17 Zbz, mc-moux kzdq kz enjrl kc tqvzpxm Mangr-nzangiongr Heven. Enjrl lc male-kzle kc toki kxka kxmalc. 18 X enjrl kc tqaclvele nyr ngr olta vzpxm mz olta. Rpibzle mz enjrl kc tqrmale toki kxka kxmalc kx, “Mzli ka mzli r nzayrlwr-lxblrpengr leplz ngr nrlc tulvzo kcng tzaleng alwx, da kc tqwai nzrkqtrngr nra grep mz toki mz mzli r nznzbrtiongr.” 19 Murde leplz kcng tzaleng alwx nzapulr nra grep. X enjrl kc tqayrlwr-lxblrle leplz lcng, apule ncblo kc tqrlakipx nra grep mz toki scde. X leplz lcng sc tzayrplapx-zlwzpeng mz zngya ngr drtwr Gct kc qtubq-esz'ngr, apule nzrtcongr nra grep mz da kxetu kx narnzbrtio-ngrdr mz nzwz-krdrleng murde nangi lue. 20 Mzli kc tznzbrtiongr nra grep, lue lr nra grep kxpc yrlepx zlwz. X mz nqmq lcpwz, Gct sa na-ayrplapxle leplz ngr nrlc kcng tzaleng alwx. Sa na-apule kx rnzbrtiole nidr, x mepyr ngrdr kxpc nayrlepx kz na-apule nzyrlepxkr lue lr nra grep. X me nakrlzbx nubla ngr mepyr ngrdr takitr kilomita kx trtqki-tq (300) x nzboo-krde krlzmlc nabx ncblo, murde nzayrplapxkr Gct kxnzaleng alwx sa naetu-esz'ngr. ✧

✧ **14:15** Joel 3:13; Matiu 13:30, 39-43 ✧ **14:20** Asaea 63:3; Nzyrningr 1:15

*

15

Nzayrplapxngr Kxnzrmnr-ngrbzngr Kcng Rlimz Tzoliqting Heven

¹ Mz nibrde, mc-moux r kx kxmatq mz bongavz x kctipx-zlwzx. Enjrl nzrlimzng nzkabz badr nza-yrplapxngr rlimz. kxnzrmnr-ngrbzngr. Murde mzli kc nayrkrpx-ngrbz nzayrplapxngr lcngr, zngya ngr drtwr Gct kc tqyrkrpxpe-kzpz. ² X mc-kzx prla kx apule dzpq kx rlxlvzmi nyr. X leplz kcng tzaovxiolr Mrlx Kc Tqdrka'ngr, murde trnzangioldru mqngrde kxnzlx x nzpx-ngrdr nzrtwzkrdr r kx ngr drtqde. Nztu-aepztrng mz prla lc x nzrmale-lxblrng gita kx kabz Gct badr. ³⁻⁴ X nzngr-ngrdr nabz ngr nzmyalz-esz'ngrkr Gct mz nzarlax-kai-krde leplz nedeng mz kxnzawz nede Mosis, x mz Nei Sip kc ate. ✧ Nzrpilr kx, "Yawe, Gct kc tqrninr, King abzo mzli kc bqnc Krlzmle mzli ka, nzwz-krmqng myapx-Esz'ngr x kctipxkrng. Nqm q krmqng da angidr, X tubq-esz'ngr. Leplz nzamrluelr nim. X trpnzngr kx napxtxpx-ngrde Nzglqlz-krde nqm q krm.

"Nim txpwz kxtr-esz'ngr,
X nzamrluelr nim.

* **14:20** Nzboikr nubla ngr mepyr lc apule mrka Santz Krus krlzbzle Santz Ana o Santa Krus krlzbzle Tikopia. ✧ **15:3-4**
Nzrlaszng 15:1

Trpnzngr leplz kx napxtxpx-ngrde

Nzglqlz-krde nqmq krm.

Murde nqmq krmqng kxtubq,

Lr nrlc amrlx sa navzmqng

Mz nzangio-krdr nim.

Murde aelwapxpe-ngrn nqmq krmqng kxtubq,

Tubq-esz'ngr, eu." ☆

⁵ Mz nibr nzngr-krdr, obqlzbo x mcx Mrkc Tqtr-esz'ngr mz nabz Tentkxtr nzlvxpxpe Heven. ☆ ⁶ X nzvzpxmqng elr enjrl kcng rlimz tZRka-nebang nzayrplapxngr kcng rlimz. Enjrl lcng nzkqng amrlx ngrdr nzkq kxprkitxpx, x nzlunyao-ngrdr kc da kx apule gol. ⁷ Zbz kzdq kxnzlung kcng pwx twzbzle baol rlimz kx ngi gol ataplxsr-ngrde enjrl kcng rlimz. X Gct kc tqllu zvz, sa nalva-puliole mz nrlc zngya ngr drtwrde na-apule baol lcng nayrbu-lxblrng mz nzayrplapx-krdeng. ⁸ Mrkc Tqtr lvabqtx atwrnrngr zskapu kx vzpxm mz zluli x zmatq ngr Gct. X trtxpnzngr kx navztr Mrkc Tqtr, navz navz nakrlz-zpwxzbzle nzyrkrpx-krbz nzayrplapxkr Gct lcng rlimz tztwzm enjrl lcng rlimz. ☆

16

Nzayrplapxngr Kcng Rlimz Narmnr-ngrbzng

☆ **15:3-4** Jeremaea 10:7; Sam 86:9 ☆ **15:5** Nzrlaszng 38:21; 40:1-33; Aposol 7:44; Hibru 8:5 ☆ **15:8** Nzrlaszng 40:34; 1 King 8:10-11; 2 Be Ngrdr 5:13-14; Asea 6:4

¹ Zbz xlrx kc natq Gct kx xplr Mrkc Tqtr, rpibzle mz enjrl kcng rlimz kx, “Vzamu, x odati-atwrnr-ngrnamu dalr nrlc mz zngya ngr drtwrnge, na-apule baol ngr lue kxpq kc tzpulilvztiongr da, x blo atwrnrngr.”

Baol Kc Kai Drtwr Ngrde Kxsqki Kxtrka

² Enjrl kc kai vz x puliole baol scde mz nrlc. X kxsqki kxtrka apule naasake x nranrpqdo dwatibzle leplz kcng tztwzlr rkk ngr Mrlx Kc Tqdrka'ngr, nzangioldr mqngrde. ✧

Baol Krali Drtwr Ngrde Nzatrkingr Prla

³ Zbz enjrl krali puliole baol scde prla. X prla yrnclvz apule mepyr ngr ncblo kxbz. X dalr prla amrlx nzbzting. ✧

Baol Kratq Drtwr Ngrde Nzatrkingr Lue

⁴ Zbz enjrl kratq puliole baol scde mz lue x aulzng, x lue amrlx nzlrtipxlr mepyr. ✧ ⁵ X xlrx enjrl kc tqaclvele lue amrlx, rpibzle mz Gct kx, “Gct, nim txpwz kxtr-esz'ngr, mncq mzli ka x mnc-zvzq mzli kc. X nzayrplapx-krm lcng tqtubq-esz'ngr. ⁶ Murde leplz lcng tznibqtilr profet x leplz kxnztr nemqng mz nzayrle-krdr mepyr ngrdr. Mz nzmu-krde lcde, ayzlu-mou-ngrbzme badr mz nzlrtipx-khme lue pqdr mepyr x rka txpwzme mqdr mepyr. X me tubqki nzxpengr nidr delape.” ⁷ Zbz xlr-moux natq leplz kcng tznibqti vzpxm mz olta, nzrpilr kx, “Kxetu

✧ **16:2** Nzrlaszngr 9:9-11 ✧ **16:3** Nzrlaszngr 7:17-21 ✧ **16:4** Sam 78:44

rgr, nim Gct kc tqrninr. Awitxpe mz nzayrplapx-krm krkcng tznibqtilr nigr! Murde drtwr kcng tqyrlqpeq rsakrlrngr x tubq zvx.” ☆

Baol Krapwx Drtwr Ngrde Nzpqr Nzulr Nepi

⁸ Zbz, enjrl krapwx twzle baol scde x pulilvzle nepi murde nzulr lr nepi na-apqle ncblo, x nrkrdrtdr nabxuting. ⁹ X mzli kc tzbxuti-ngrdr mz nzulr nepi, nzpibqtilr Gct kc tqatwzlr-ngrm nzayrplapxngr lcng. A' nzpctxpx-ngrdr nzteqtrkrdr nqm q nr drtwrdr murde naglqpxlr nide.

Baol Kranzlvqn Drtwr Ngrde Mrnyz Mrlx Kc Tqdrka'ngr Kc Kai Wx-nzlotx Atwrnrngr

¹⁰ Zbz enjrl kranzlvqn twzle baol scde x puliobzle mz tron nyz Mrlx Kc Tqdrka'ngr kc kai. X mztea amrlx kcng tqaclve Mrlx Kc Tqdrka'ngr wx-nzlotx atwrnrngr. X leplz ngr mztea lcdeng tzmakitilr nalzpqdr murde nzetq-zlwzkr drtdr etunepxpe mou. ☆ ¹¹ X sc tzpibqti-zlwzpelr Gct kc Heven mz nzetqkr drtdr x kxsqki rdr, a' nzpctxpx-ngrdr nzesakingr nzalengr alwx.

Baol Kraesz'mz Drtwr Ngrde Nzpzkr Lue Yufretis

¹² Zbz enjrl kraesz'mz puliole baol scde mz Lue Yufretis, x lue lc etu pzlz-pnzm, murde narlr-ngrbz mz king r me prkilzm nepi nzkawimio-krmleng ami nedrng. ☆ ¹³ X mcx drka'kxnztrkang nztqng, nzapulr teblika. Dwapxm kc mz nao Mepwz, dwapxm kc mz nao Mrlx Kc Tqdrka'ngr kc kai, x dwapxm kc mz nao Profet Kc Tqpokia, (kc tqngi kz Mrlx Kc Tqdrka'ngr

☆ **16:7** Sam 19:9; Nzaelwapxngr 6:9-10; 19:2 ☆ **16:10** Nzr-laszng 10:21-22 ☆ **16:12** Asaea 11:15-16; Josua 3:13-17

krali). 14-16 Drka' lcng nztqng nztrka-zlwzng, x nznrgiscng zmatq ngr nzalrtingr da. Sc tzayrlwr-lxblr-ngrdr king amrlx ngr nrlc me esz', drtqde 'Newz Magedon,' mz nznngini-krdr ami kxes' kxetu. Mz Mzli Kxmatq lc, Gct kc tqrninr sa naotang badr Mepwz, Mrlx Kc Tqdrka'ngr, x Profet Kc Tqpkia badr ami nedr. ☆

X mz nzymnekr Jiszsz mz nzyzlu-krmle, rpile kx, "Ninge la nayzlu-mopwc' mz nrlc. X nzvz-krmc na-apule nzvz-krm ncblo kx pna da kx trnzoliqtu. A' sa namrlzbx mz doa kx oliqtile nzvz-krmc, na-apule ncblo kx obq zvz x yrlqbxle lrpzde mz nzaenzli-krde nzvz-krm kztede. Nzmu naoliqtuq mzli kc navz-ngrmc, drtqm trnamyatrpwzu mz mz leplz, mz nzapu-krm ncblo kxycblq mz nzvzne-krde."

Baol Krarlimz Drtwr Ngrde Nzodatingr Da Kxkqlu

17 Zbz enjrl krarlimz puliole baol scde mzlixl. X natq Gct vzpxm mz tron kc Mangr-nzangiongr, etumi nate nznpi-krde kx, "Kapupxpe!" 18 X mzli lc bzlrpc tqptipx x bzlrmei tqyrputipx x nengq kxetu-esz'ngr aycnglrlle nrlc atwrnng. Krlc nengq kx myatpxpebz. Trgalr nengq kxetu kxmule lc abzo mzli kc tzwzng ncblo, krlzmle mzli ka.

19 A' Gct trmrbrtru mz drtwrde alwx ngr leplz ngr taon kc etu tqapule Bxbilon kc bqnc. X ayrplapx-zlwzle nidr mz nznplkrkr zngya ngr drtwrde. Mz nzmu-krde lcde, taon kc etu glqwitpx ncte tq, x taon mz nrlc tulvzo nzodating amrlx.

☆ 16:14-16 2 King 23:29; Sekaraea 12:11; Matiu 24:43-44

✧ 20 X mzli lcpwz trmctung x newzng amrlx nzmrbrlzmqng mz nengq kc etu. 21 X muli-aes kx etuting kz rlxom mz bongavz nztabqlr leplz. Nzmrlepu-lxblrkr ncte kxes' takitr kilo kx nzpnu-nzlvqn (50). A' leplz sc tzpibqti-zlwzlr Gct mz nzrlxo-krm muli-aes, murde nzayrplapx-krde trka-zlwzbz badr. ✧

17

Nzycmne-ebzpxngr Srlx Kc Drtwr Ngrde Taon Kc Etu Rom

1 Mz nibrde, kzdq enjrl keng rlimz tznrgiscng baol keng rlimz, vzm bange x rpimle kx, "Navzki, murde na-aelwa-ngrbo bam nzayrplapxkr Gct taon kc etu tqapule Bxbilon kc bqnc. Taon lc tqyc mz mzlr lue kxkqlu. X lr taon lcng nzprszpxlr Yawe Gct angidr mz nzangio-krdr kx trngiu Gct angidr. Nzapulr olvz kxyrlz kc tqprszpxle ncblo ngrde angidr mz nzrmwimi-abeane-krde ncblo kzbleng. ✧ 2 X king amrlx mz nrlc nzaxvctr-lzbqbnzng mz alwx ngr nzrprszpxngr Gct angidr. X leplz amrlx ngr nrlc nzpctxpx-kz-ngrdr Gct. Opxm kx nzalukurnngr nzmnrqngr, mz nzaxvctr-lzbq-krbzlr kz badr king rdr." ✧

3 Zbz mz zmatq ngr Mqngrkxtr, enjrl lc sc tqvzmitrpele ninge lzke. Mcx mrlcde olvz kc tqngi srlx, krlc taon kc etu tqapule Bxbilon. Olvz lc wxbuom mz Mrlx Kc Tqdrka'ngr kc kai, tqpctx, x narde rlimz, x dxpa' krde nzpnu-esz'. X nrkrdrdqde nzyr-ngaleti drtq kx nznzlvzongr

✧ 16:19 Asaea 51:17 ✧ 16:21 Nzrlaszng 9:23 ✧ 17:1 Jeremaea 51:13 ✧ 17:2 Asaea 23:17; Jeremaea 51:7

Gct. ⁴ X olvz lcde kq nzkg kxlqlwx x kala ngrde prpol x pc. X rlu kz da kx nzwzngz mz gol, prl x rplz kxlqlwxng. X malele kc kap kx nzwzngz mz gol, kx yrbulzm mz waen kxngangr x kxblqki kx vzpxm mz nzrtrngz-abeane-krde da kx myangr drtq mz nzangio-krde drka'. ✧ ⁵ X mz rtrlmzte kz nzyrtr elr drtq kx drtwr ngrde yc kapq, rpile kx,

BxBILON KC ETU,
LXEDE SRLX AMRLX,
X NOU DA KXDRKA'NGR
X DA KXMYANGR DRTQ AMRLX MZ NRLC.

⁶ X mcx kx olvz lcde abrtz-zlwz-ngrde nznribqti-krde leplz kxnztr neng Gct, kcng tznibqti-ngrdr murde nzrpipx-krdr Nrpa ngr Jisz. Opxm kx olvz lc alukurnrgr nzrmnq-krde mepyr ngrdr. Kx mcx olvz lc pwrkilvctx-ngrne.

Drtwr Ngr Srlx Kc Tqngi Rom X Mrlx Kc Tqdrka'ngr Kc Kai

⁷ Zbz sc tqrpipem enjrl kc bange kx, “?Nike tqpwrkilvc-ngrn olvz lc? Olvz lc x Mrlx Kc Tqdrka'ngr tqvone-ngrde nzapulr nzymne-ebzpxngr. X sa nayokaetipxbo bam drtwr ngrde.

⁸ Mrlx Kc Tqdrka'ngr tqmcq, lu mzli kc kai, a' trlupeu mzli ka, x mzli trnaboju sa navzdzm mz gq kc trpnzngz noude. X sa nao-zlile lrpzki kx vztr mz nzodatingr nide. Lr nrlc kcng drtqdr tryclzpuu mz Buk ngr Nzlungz, yzuo pnz mzli kc Gct tqwz-ngrde nrlc, sa naktipxlr Mrlx Kc Tqdrka'ngr tqllu mzli kc kai a' trlupeu mzli ka mz

✧ 17:4 Jeremaea 51:7

nzyzlu-kr-mople. Murde mz drtwrdr krlc ngi r kx kxmatq.” ✧

⁹ X rpi-mop enjrl kc bange kx, “Drtwrm na-aotr-angidrbzme mz da kcng napibo bam mz nzkriz-krmleng mzli kc naprtz-ngrdr. Mrlx Kc Tqdrka'ngr narde rlimz. Narde lcng drtwr ngrdr newz nzrlimzng, newz ngr taon kc etu mrkc tqmncngr srlx kc. ¹⁰ X nar kcng rlimz drtwr ngrdr kz king rlimz kx na-acvelr taon nyzde lc etu. King lcng nzlvqn nzaclvepeng, x king kraesz'mz kc tqaclevele mzli ka. Zbz krarlimz sa na-acve-kzle taon kc etu kalr. X mzli kc navz-ngrmle, namncti-tpwzle mzli namrbcnepwz. ¹¹ Kzdq king mz king lcng rlimz na-acve mou. Sa nanginide king krartqmz. Krlc Mrlx Kc Tqdrka'ngr tqlu mzli kc kai, a' mzli ka trlupeu. X nao-zlile lrpzki kx vztr mz nzodatingr nide.

¹² “Dxpa' lcng nzpnu-esz', drtwr ngrdr king r mrkzbleng nzpnu-esz' kx trnzprtrkang mz nzaclvengr. A' king lcng sa narngiscng zmatq ngr nzaclve-krdr badr Mrlx Kc Tqdrka'ngr mzli kc navzm. X nzaclveti-tpwzlr mzli trnaboio na-apupwzle nabz nepi kxesz'. ✧ ¹³ X king lcng nzpnu-esz' drtwrdr sa naesz'ti x nakaobzlr nzxplr-krdr x zmatq ngrdr mz Mrlx Kc Tqdrka'ngr. ¹⁴ X sa nartwzng vea badr Nei Sip x leplz nedeng. Leplz nede lcng tqkqleleng x tqmcpxleng x nzvz-nqblq-zvzlr nide. X Nei Sip lc sa na-aovxiole Mrlx Kc Tqdrka'ngr x king kcng, murde nide Kxetu r kxnzeturng amrlx, x King r king amrlx.”

✧ **17:8** Daniel 7:7; Sam 69:8; 2 Tesalonika 2:3 ✧ **17:12** Daniel 7:24

¹⁵ Zbz rpi-mop enjrl kc bange kx, “Mcpeq lue kcng tzesotrpzng mrkc tqmncngr srlx kc. Lue lang drtwr ngrde leplz ngr natq x drtc' amrlx mz nrlc x zbo ngr leplz kxetu. ¹⁶ X king kcng nzpnu-esz' badr Mrlx Kc Tqdrka'ngr, sa natrkati nivz lrd r taon kc etu tqapule srlx kc. Sa nakatxpxmlr mz taon lc da kxmrlzting kcng tqqlwx amrlx, mz nzapu-krde kx na-aycblqtxdr srlx kc. X sa natrkati-x-zlwzlr nide mz nzapu-krde kx nzngqdr ncvr drtqde, x na-ayrkrpxlr nide mz nzangc-krd rle mz nyr. ¹⁷ Na-alelr da lc murde Gct kx ryrlqtrpz drtwr mz nabzdr. Murde navz-nqblqlr me pnz drtwrde, mz nzesz'tikr drtwr king kcng nzpnu-esz', mz nzkao-krbzlr zmatq ngr nzaclvengr scdr mz Mrlx Kc Tqdrka'ngr. Murde na-aclveng navz navz mzli kx tutrngr natq Gct amrlx nzatutr-ngrdr. ¹⁸ “X olvz kc drtwr ngrde taon kc etu tqapule Bxbilon kc bqnc, kc tqaclve-zpwxe king amrlx mz nrlc.”

18

Gct Odatile 'Bxbilon' Kc Tqngi Taon Kc Etu Rom

¹ Mz nibr da lcng, mc-moux kc enjrl kx vzom Heven. Enjrl lc rngisc zmatq kxetu x nrlc yzlr-atwrnrngr mz zluli rde. ² X sc tqnemipele nzrpi-krde kx, “Bxbilon kc tqngi srlx kc etu, tzodatipe, eu nzodatipe. Taon kc etu mzli ka ngipe me nzmnc-ngrdr drka', drka' kzpetong, x da kxtrka amrlx kx nzlvcneng mz bongavz kx nzapulr palc x kqba. ✧ ³ X lr taon kc nzprszpxpelr Gct angidr x nzangioler kx trngiu Gct angidr. Nzapulr olvz

✧ **18:2** Asaea 13:21; 21:9; 34:11-15; Jeremaea 50:39; 51:8, 37

kxyrlz kc tqprszpxle ncblo ngrde mz nzrmwimi-abeanekrde ncblo kzbleng. Leplz amrlx badr king rdr nzaxvctr-lzbqzbzng mz alwx ngrde, mz nzapu-krdr ncblo kcng tzrmnq-zlwzng. X ncblo kxnzatatrpqng trau mz nzamwa-krdr da mz nrlc, nidr bcnyr kxnzrngisc-zlwzng. Murde nzamwang da kx naesatpxpngr drtwr leplz ngr taon lc, mz nznigini-krdr kxnzrkcmnz-zlwzng x kxnztrkibr-zlwzng.” ✧

⁴ Zbz, xlr-moux natq Gct Heven, rpile kx, “Leplz nengeng, dwaszpeamu lr taon lcng, ma tqaxvctr-lzbq-kzpzmu mz alwx ngrdrng, x ma tqprtrkzamu mz nzayrplapxngr nidr. ✧ ⁵ Murde alwx ngrdrng kqlu-esz'ngr, x nqmq krdr trtx-pnzng nzmrbtr-krde mz drtwrge. ✧ ⁶ Ayzlumopwzmu badr nikeng nzale-kaipzlr bamu. A' mz nzayzlu-krbzmuleng badr, nangi nqvi lxblr mz nikeng nzalepebzlr bamu. Nzaetqngr drtq kc tzkabzlr bamu nangi nqvi kz nzxplr-krde x kabzmu nzetqkr drtqdr. ✧ ⁷ Leplz ngr taon kc, mz drtwrdr nzmyapx-esz'ngrng x trpnzmoungr kx apule nidr, x trpnzng da kxtrka kx naprtzbz badr. Nzapulr srlx kc tqglqpx-lzbq mz nzrpi-krde kx, ‘Ninge Kwin mzli ka.’ A' nimu leplz nengeng, rtultr-ngrbzm bade nzavzo-lzbq-krde. X srlx kc mz drtwrde abrtz zvz kz, mz nzrpi-krde kx, ‘Trnipc'u kxabzo kx yrni x drtwrde vz.’ A' kabzmu bade nzyrningr x nzvzkr drtwr. ⁸ Taon lc sa naodati mz nyr murde ninge Kxetu Gct kc tqrninr-esz'ngr sa

✧ **18:3** Asaea 23:17; Jeremaea 51:7 ✧ **18:4** Asaea 48:20; Jeremaea 50:8; 51:6, 9, 45 ✧ **18:5** Nou 18:20-21; Jeremaea 51:9

✧ **18:6** Sam 137:8; Jeremaea 50:15, 29

na-ayrplapxx nide mz nzatrkatikrnge nide mz zyagox, nzyrningr, x dzbi mz zbq kx esz'txu. ✧

9 “King mz nrlc kcng tzprtrng badr mz alwx ngr nzprszpx-krdr Gct x alwx ngr nzrkcmnzng x nztrkibrngr, sa namclr zshikapu ngr nzngckr taon lc. X nayrni-ngrdr nzbz-krde, murde da kxmr-lzting kcng tzkcmnz-zlwz-ngrdr sc tzodatipeng.

10 Sa natubzng rlrz mz nzmwxlrtrikrdr nzaxvctr-lxblr-krbzlr mz nzodatingr taon kc. X narpilr kx, ‘Rlr, rlr, nim taon kc etu tqapule Bxbilon kc bqnc, kc tqngi-bcnyrlr x matq. Nzodati-aningr nim apule bzlrpc kc tqpcpx.’ ✧

11 Zbz rpi mou Gct kx, “X kxnzamwang da sa nayrning x navzti drtwrdr nide, murde trpengr kx naxpebz da lcng tzamwatilr. ✧ 12 Murde nzamwati-pnzng da kxkqlu lcde seleng: da kxn-zlu nzwzng m z gol, silvz, prl, x rplz kxlqlwxng, lrpz kxnzkqng kxprki, kxprpol, kxpc x kx ngi silk. X nzamwati-kzng trprpa ngr nounc kx nzapulr nc bq, x da kx nzlz mz nounc kxlqlwx, bras, aian, rplz kxlq nzrpibz ‘mabol’ x mz nqngi elefant nzrpibz ‘aevri.’ 13 X nzamwati-kzng bqrlr nounc kx bletipxng, x tolo kx mnrt mrlz zlwz, x da kx na-amrlzle dakxnzng kx nzapulr ba x riya. X nzamwati-kzng dakxnzng kx nzapulr wit x flawa ngrde, waen, tolo ngr nra nounc olivi, x kzu, sip, hcsi, x sariot ngr vea. X nzamwati-kzng leplz kxnzawz-nrbalqng.

14 “Eke Bxbilon! Da kxmrlz kcng tqsutu drtwrm yrkrpxpebz, x da kcng tqngi-bcnyrlr-ngrn x

✧ 18:8 Asaea 47:7-9 ✧ 18:10 Esikel 26:16-17 ✧ 18:11 Esikel 27:12-36; Asaea 23:14

nzobq-ngrbz tqmrlzvxiting mrbrtipeng. X trpengr nznngisc-krmleng. ¹⁵ Ncblo kcng tzaleng da tqangi-bcnyr-ngrdeng, sa natubzng rlrū mz zmwxlṛ, murde ma tzodati-kzng. Ncblo lcng sa nayrning x drtwṛdr navz. ¹⁶ X narpilṛ kx, ‘Rlr, rlr, nim taon kc etu, mzli kc kqq lrpz kxlqlwx x kxprpol x kxpctxpx scmṛng. X rluṛ kz da kx nzwzngṛ mz gol, prl, x rplz kxlqlwx. ¹⁷ A’ da lcng tqmrlz scmṛng amrlx nzodati-aningṛ apule bzlrpc kc tqpcpx.’

“Mzli lc, kapten, kxnzwzng mz lcsu, kxnzalilvcṛng lcsu, x leplz kx nzmabzng prla amrlx, sa natutr-kzpqng rlrū. ¹⁸⁻¹⁹ X mzli kc namc-ngrdr nzvzdzkr zskapu ngr nyr kc tqangle taon kc, sa nanemilṛ mz nzyrni-krdr nzrpi-krdr kx, ‘Esaē! Trpnz-moungr taon mz nrlc ka kx narsakrlṛng ncdṛ taon kc etu. Rlr, rlr, taon kc etu! Leplz amrlx kcng tznngiscng lcsu angi-bcnyrlṛ-ngrng mz dztumṛng. A’ nim la tzodati-anipe mzli ka tqapule bzlrpc kc tqpcpx.’ X sa nakilvztilṛ nardṛ drtc’ mz nzvzkr drtwṛdr. ²⁰ Mz nzmū-krde lcde, abrtzamu nimū lr Heven, nimū badṛ aposol, x profet, x leplz nengeng amrlx, murde odati-ngrne nide mz nikeng alebzleṛng bamū.” ✨

²¹ Mz nibr nzymnekr Gct lc, kzdq enjrl kx xplr kalzmlc kc rplz kxmṛlepu, rtco-ngrde prla, x rpile kx, “Kxnamū nzodatingṛ taon lc etu delc, murde mzte nambrtx alo. ²² Trpengṛ natq gita, ncblei, x trpu, x trpengṛ nzngrngṛ kx naxlrtr-kz-mopwz elṛ. Trpengṛ ncblo kx namabzng elṛ. X trpengṛ kx narbing kai elṛ. ²³ Bxbilon trpengṛ lam

✨ **18:20** Lou Kcpwz 32:43; Jeremaea 51:48-64

kx nayzlrpx-ngrm bam, x trpengr ncblo x olvi kx nayrlzpx-mop bam. Nzodatingr nim vzpxm mz ncblo nemqng, kxnzeting kcng tznginidr bcnyrng mz nrlc. Murde nzesabrtilr leplz ngr mrkcng kqlu mz nzmrlzba-krdr dztumqng myaszpxle nzmrlzti-krdr Gct, apule kx rwitiq nidr dabo nem. ✧ ²⁴ Eu Bxbilon, x nzodati-kzp murde ayrleq mepyr ngr profet x leplz kxnztrng ne Gct, badr mepyr ngr leplz neng Gct mrka mz nrlc kx nznibqting.” X krlc nzyrkrpxpekr nzayrplapx-rmnrkr Gct kcng rlimz.

19

Leplz Ngr Heven Nzglqpxlr Gct

¹ Mz nibr nzodatingr Bxbilon, xlrz nzmqlqr zbo ngr leplz kxetu Heven. Nzrpilr kx, “Awi Yawe! Naglqpxku Gct rgu kc tqngi nou nzl-rapxngr, tqrngiscde zluli x zmatq. ² *Murde drtwr kcng tqyrlqpeq rsaklrngr x tubq zvx.* ✧ X ayrplapx-ngrde srlx kc nzrbatr-krbzle mz lr nrlc nzprszpx-krdr Gct angidr, x sc *tqayzlubzle bade mz nzvz-nqblq-krde nibqti-krde kxnzawz nedeng.* ✧ ³ Awi Yawe! Naglqpxku Gct! Mzli ka taon kc tqvz-nqblqle nqm q kr srlx lc sc tqngcpe, x *zsikapu rde nzvzd-krde la, tqvzpe tqvzpe.*” ✧ ⁴ Zbz kxnzaclveng kcng nzpnu-li-nrade-pwx (24) x kxnzung kcng pwx nzyrngzong, x nzangioldr Gct kc tqwxbuom mz tron, nzrpilr kx, “Delape! Awi Yawe! Naglqpxku Gct!”

✧ **18:23** Asaea 24:8; Jeremaea 7:34; 16:10; 25:10 ✧ **19:2** Sam 19:9 ✧ **19:2** Lou Kcpwz 32:43; 2 King 9:7; Sam 19:9; Asaea 34:10 ✧ **19:3** Asaea 34:10

5 Zbz kzdq natq vzpxm mz tron, rpile kx, “Glqpxamu Gct rgu, nimu amrlx kcng tzvztrpzng bade x tzamrluelr nide, kxmule-esz' nimu ncblo kxnzeturng o ncblo txneng.” ✧ 6 Zbz xlr-moux kc natq kx apule nzymne-katokr zbo ngr leplz, x apu-kzle nzyrlekr me talipx ngr lue, x apu-kzle nzyrpupxkr bzlrmei. Nzrpilr kx, “Awi Yawe! Naglqpxku Gct! Murde Kxetu Gct kc tqrninr, nide txpwz King r leplz amrlx. ✧ 7 Drtwrgu naelalm x na-abrtz-zlwzku, x naglqlzku Gct. Murde krlzpebzle mzli r nzyrlzkr Nei Sip. X olvz kxmnc-kamelr kc nayrlztile oliqti-lzbqpe. 8 Nzkapebz bade nzkq-ngrde kc lrpz kxlqlwx kxprki x aglqpx'.” Olvz lc drtwr ngrde leplz kxnztrng ne Gct, x lrpz kxprki lc drtwr ngrde da kxtubq-esz'ngr kcng tzaleting. 9 Mrlz, rpi-mop enjrl kc bange kx, “Yro natq lcng. Sa namrlzbx mz leplz kcng tzaveating mz nzprtr-krdr mz nzyrlzkr Nei Sip. Zpwxtx! Krlcng natq Gct.” ✧ 10 Zbz ninge kc tqrweopebo zpr mz enjrl lc, a' rpimle bange kx, “Bzkq! Angio txpwz Gct! Murde wztr-kzpo bade Gct, apu-kzx nim x kztemqng kcng tzabrtr-zvzbzlr drtwrdr mz Nrpa ngr Jiszsz Kxnmcpx. X nrpa lc tqngi nou da amrlx kcng tzpipxlr profet.”

Nzvz-krm Kraes

11 Zbz obq-rmwible-moux, x mcx nzobqkr naonrx ngr Heven, x mcx kzdq hcsi kxprki. X Kraes kc tqwxbuom elr nzrpibz ‘Kx brti drtwr’ x ‘Kx atutr zvz natqde.’ Drtwr kcng tqyrlqpeq

✧ 19:5 Sam 115:13 ✧ 19:6 Esikel 1:24; Sam 93:1; 97:1; 99:1

✧ 19:9 Matiu 22:2-3; Luk 14:15-24

x nzrtwz-krde vea rsakrlrngr x tubq zvx. ✧
 12 Mzte apule nqngi nyr, x narde lao-ngrm kraon
 kxkqlu. X nzyrtrpz kc bade drtq, a' nide txpwz
 kx rkrlz drtwr ngr drtq lc, x trpnz-moungr leplz
 kxrklz kz. ✧ 13 Mz nzm-krde lcde, drtqde
 nzrpibz Natq Gct. X nzkq kc tqkq-ngrde bxlz
 zlwz mz mepyr. 14 X ami ngr leplz ne Gct nzvo-
 nqblqr mz hcsi kxprking, x nzkq-lxblrng nzkq
 kxlqlwx kxprki x pnapr. 15 X ncblo kc tqrmailz
 lvcpxm mz naode kc toki r vea kxmalc kx naota-
 ngrde mz nzaovxio-krde lr drtqbrng amrlx. X
*na-acleve nidr mz zmatq kx xplr-esz'ngr na-apule
 bz kc tqrniglc botol.* ✧ X na-apusr-ngrde nidr nra
 grep kcng tqrnzbrtile, mz zngya ngr drtwr Gct kc
 tqrninr. ✧ 16 X nzyrtr mz nzkq scde mrkc tqyc-
 zbztr dcdrade, drtq lcde sele:

KING R KING AMRLX
 X KXETU R KXNZETUNG AMRLX.

Vea Kxetu

17 Mz nibrde mc-moux kc enjrl, tu mrkc tqrp-
 nakim nepi. X mz nate kxetu, sc tqkqlepele utc
 ngr wq amrlx, rpibzle kx, “Vzmamu x yrlwr-
 lxblramu mz nzmungr kxetu kc tqtrrngztibz Gct.
 ✧ 18 Vzmamu x ngqnamu namz ngr leplz amrlx,
 kxmule-esz' king, kxnzetung rdr ncblo ngr vea,
 ncblo ngr vea, kxnzawz-nrbalqng, kx drtqdr opx,
 kxnzetung, leplz txneng, x kxnzvoneng mz hcsi
 badr hcsi nedrng.”

✧ 19:11 Esikel 1:1; Sam 2:9; 96:13; Asaea 11:4 ✧ 19:12 Daniel
 10:6 ✧ 19:15 Sam 2:9 ✧ 19:15 Asaea 63:3; Joel 3:13 ✧ 19:17
 Esikel 39:17-20

19 Zbz mc-moux Mrlx Kc Tqdrka'ngr kc kai badr king kxkqlu ngr nrlc ka x ami nedrng, nzata-lxblrtipx-lzbq-ngdrdr nzota-krdr badr Kraes kc tqwxbuom mz hcsi lc, x ami nedeng. ²⁰ Zbz sc tzlolvzpelr Mrlx Kc Tqdrka'ngr tzadwatrng mz presin ncdr Profet Kxpokia, kc tqaletrpz rkx mz mz Mrlx Kc Tqdrka'ngr. X mz rkx lcng, dekc tqesabrti-ngrde leplz kcng tztwzlr rkx ngr Mrlx Kc Tqdrka'ngr, x nzangioldr mqngrde. Mrlx Kc Tqdrka'ngr ncdr Profet kc Tqpokia, nzrtco-amrnangr mz Dxbu Nyr kx nzulrde rbq, x ngc mz rplz salfz. ✧ ²¹ X ami nedrng nznibqting mz toki r vea kc tqlvcpxm mz nao ncblo kc tqvone mz hcsi. X utc amrlx nzmuti-krdr nelzdr krlc angidr mz nevrdr.

20

Yiz Siu-esz' (1,000)

¹ Mz nibr Kxnzmcpv nzaovxio-krde Mrlx Kc Tqdrka'ngr, obq-rmwible-moux, x mcx kc enjrl kx vzom Heven, malele ki ngr gq kc trpnzng noude x sen kxetu kxmrlepu. ² Enjrl lc aovxiole Mepwz kc etu, tizrpi-kzpz 'Nar Drka' x 'Setzn' kc tqngi kz ningidoe ngr nrlanc kc bqnc. X otibzle Mepwz lc, x bxtile sen kc, murde nayrbqtile yiz siu naesz' (1,000). ✧ ³ X rtco-ngrde mz gq kc trpnzng noude. Apqbrobzle naonrx ngrde x amqngitxde, murde navz navz nakrlz-zpwxbzle yiz kcng siu-esz' x tqesabrti-moupele lr drtqbrng kc ate. X mz nzvz-nqblq-krde me pnz drtwr Gct, mzli lc drtqde sa na-aopxbz mzli kxpipz.

⁴ Zbz obq-rmwible-moux, x mcx kcng tron kxkqlu Heven, x nzwxbuopemqng elr kxnzrlxngiting amrlx murde nzaprcbz badr zmatq ngr nzacive-krdr badr Kxnzmcp x yiz siu-esz' (1,000). X mc-kzx mrlcde mqngr krkcng tzlakitipxbz nardr, x krkcng amrlx tznibqng mz nzrpipx-krdr Nrpa ngr Jisz x natq Gct, x krkcng trnzangiolru Mrlx Kc Tqdrka'ngr kc kai x mqngrde kxnzlx, x trnzyrtrpwzu rlx ngr Mrlx Kc Tqdrka'ngr mz rtrlrnztr o mz mqdr. Krkcng tzrlxngiting amrlx nzlupe-moung mz nzacive-krdr badr Mevalu Kxnzmcp. ✧ ⁵ Leplz lcng tzlxngitilr Jisz, nidr dalr nztulz-mou-ngrm kc kai. A' kxnzbzng amrlx kcng trnzlxngitilru Jisz, sa na-atulz-kz-mop Gct nidr mz nzbz-krdr mz nibr yiz kcng siu-esz'. ⁶ Sa namrlzbz mz leplz kcng tqatulz-mopqng Gct mz nzbzng kc kai, murde nidr leplz neng Gct. X trnartco-ngru nidr mz Dxbu Nyr kc tqngi nzbzng kxrmnr-ngrm. X nidr kx nangi pris ne Gct ncd Mevalu Kxnzmcp, x na-acivetilr badr Mevalu yiz siu-esz'.

Nzaovxiongr Setzn

⁷ Mz nibr yiz lcng siu-esz' (1,000), mzli kc tqatulz-mou-ngrm Gct kxnzbzng amrlx kcng trnzlxngitilru Jisz, Setzn sc tzavzpxpem mz presin. ⁸ X sa naprpx mz nzesabrti-mou-krde leplz mrkcng amrlx mz nrlc tulvzo. X sa navzmi-lxblrmqng Setzn mz nzvecngr, x nzkqlu-krdr na-apule drta' ngr prla. Sa na-apulr ngrlrvea kc drtqde Gog, badr lr Magog kcng tznzlvzo-zvzlr Gct. ✧ ⁹ Sa

✧ **20:4** Daniel 7:9, 22; 1 Korint 6:2-3 ✧ **20:8** Esikel 38:2, 18

namnc-ngalelr mzteadau kc tqmrlzti Gct mrkc tzmncngr leplz nedeng. A' nyr sa navzom Heven naodatile nidr. ¹⁰ Zbz Setzn kc tqesabrtile lr nrlc, sa nartcongr mz Dxbu Nyr kx nzulrde rbq x ngc mz rplz salfz. ☆

Dxbu kc tzrtcope-kaingr Mrlx Kc Tqdrka'ngr ncdr Profet kc Tqpokia. X sa na-aetq-zlwzbz drtqdr mz nrckxngrlx x nrckxbq, tqyc tqyc.

Nzrpipxng Kxrmnr-ngrm Mz Krkcng Tztubqng X Krkcng Tzvz-rbrng

¹¹ Zbz obq-rmwible-moux, x mcx Gct nzwxbuo-krm mz tron kxetu kxprki. X opxm kx drtc' ncdr bongavz nzdwazlr nide, x trnzmc-pnzung. ☆ ¹²⁻¹³ X mc-kzx leplz amrlx kcng tzbzpeng, kxnbzng prla x kxnmncng mrnyz mqngr kxnbzpeng, leplz kxnetung x leplz txneng. Leplz amrlx lcng nztutrpzng mrkc tqxlvrkipx tron. Zbz Buk ngr Nzlungr, mrkc tzyrongr drtq leplz kcng naptrng mz nzlungr kxboi, nzkawxpx. X kzdung kz buk nzkawxpx kz, kx nzpipxlr da amrlx kcng tqtrngztibz doa kxes' mz nzmnc-krde. X Gct kc tqwxbuom mz tron sc tqayzlupe-ngrbzle da mz leplz mz nzvz-nqblq-krde buk lcng. ¹⁴ Trpengr kx rngisc zmatq ngr nznibqngr x nzatwzlrngr leplz mz mrnyz kxnbzpeng. Murde krkcng tznrgiscng zmatq lcng, nzrtctiope-ngrng mz Dxbu Nyr krlc tqngi nzbzng kxrmnr-ngrm. ¹⁵ X krkcng drtqdr trnzyrou mz Buk ngr Nzlungr, nzrtco-ngrng mz Dxbu Nyr. X leplz lcng mrlc nzlakipx-lzbqpeng badr Gct, tqyc tqyc.

21

Bongavz Kxmrna X Drtc' Kxmrna

¹ Zbz obq-rmiwble-moux, x mcx kc bongavz kxmrna x drtc' kxmrna, kx trpnzngr prla ngrde. Bongavz kc kai ncdr drtc' nzmrbpeng. ☆ ² X mcx mzteadau kxtr, Jerusalem kxmrna, prpx-pem Heven mrkc tqmncngr Gct, x sc tqvzom. Mzteadau lc tqtr nzoliqtipe x mzte lqngi, apule olvz kx nayrlz kc tzaoliq mz nzyrlz-krdr ncdr ncblo ngrde. ☆ ³⁻⁴ X xlrx kc natq kxetu aepztr mz tron, rpile kx,

“Ma nyz Gct ycpebz mz krkcng

Nanginidr leplz nedeng.

Sa namncpeng badr.

X Gct esz'-krde sa nanginide Gct rdr.

Drlemztr amrlx sa naycpqpxbzle.

Trpengr kx drtwrde navz,

Kx nayrni, kx nabz,

Kx drtqde navetq.

Dalr mzli kc mrbrpe.” ☆

⁵ Zbz sc tqrpipem Gct kc tqwxbuom mz tron bange kx, “Yro natq lcng, murde da angidr lcng x sa natutrng. Mzli ka atubqtipe-moux da amrlx! ⁶ Eu, kapupxpe! Murde ninge nou da amrlx x kx ayrkrpx da amrlx, x ninge kz kx ryzutr da amrlx x kx nzamrbrtx mou. Sa nakanrbalqbo mz leplz kcng drtwrdr tzbrlxkzng, lue kx yrlclzm mz vaulz ngr nzlungr kxmrna, murde nalu-moung. ☆ ⁷ Sa nakabo da lcng mz leplz

☆ **21:1** Asaea 65:17; 66:22; 2 Pita 3:13 ☆ **21:2** Asaea 52:1; 61:10 ☆ **21:3-4** Esikel 37:27; Livae 26:11-12; Asaea 25:8; 35:10; 65:19 ☆ **21:6** Asaea 55:1; Jon 4:10

kcng tzaovxiong mz nzvec-krdr badr zmatqng kxtrka. X sa nanginibo Gct rdr, x sa nanginidr doa nengeng. ✧ ⁸ A' krkcng tzmwxlrtilr nzbz-krdr mz nzvz-nqblq-krdr Jiszs, nzesablqtilr nide, x nzprszpxlr nide mz nzangio-krdr gct kx trngiu Gct angidr, nzrnibqng, nzrmwiming doa kx trngiu krnalzdr, nzrningeting dabo, nzangiong mqngr drka' kxnzlx, x nzpokiang. Leplz lcng sa nartco-ngrng mz Dxbu Nyr kc tqngc mz rplz salfz. ✧ Krlc nzbzng kxrmnrngr, x leplz lcng nzlakipx-lzbqmqng bange, tqyc tqyc.”

Jerusalem Kxmrna

⁹ Enjrl kcng rlimz mzli kc nzkabz badr nzayr-plapxngr kx nzrmnr-ngrmqng rlimz. Zbz kzdq nidr vzm bange rpimle kx, “Vzm, murde naaelwa-ngrbo bam Olvz r Nei Sip kc tqyrlz ate.” ¹⁰ X enjrl kc sc tqvzmlzpele ninge, mz zmatq ngr Mqngrkxtr, mz kzdq newz kxetu x vdz wq. Sc tqaelwapx-ngrmle bange Jerusalem, mzteadau kxtr kc tqvzpxm mz Gct Heven. ✧ ¹¹ X zluli r Gct aglqpz'ngr Mzteadau lc apule rplz daemon kc tqqlwx-esz'ngr x nzopx-krde apule dzpq. ¹² X ngrlelvz drkq kx xplr x vdz wq. X naonrx ngrde nzpnu-esz'-nrade-li (12), naonrx kcng taplxsr enjrl kxnzaclveng x nzataplxsr nzryrtrngr drtq neidu lr leplz ne Israel kcng nzpnu-esz'-nrade-li (12). ¹³ Naonrx tq lxblr mz nrlar Mzteadau kxesz'. ✧ ¹⁴ X nzwzng drkq lcdeng mz nou rplz nzpnu-esz'-nrade-li (12), x nzataplxsrngr nzryrtrngr drtq aposol neng Nei Sip.

✧ **21:7** 2 Samwel 7:14; Sam 89:26-27 ✧ **21:8** Nzaelwapxngr 9:17 ✧ **21:10** Esikel 40:2 ✧ **21:13** Esikel 48:3-5

15 Enjrl kc tqycmnem bange malele kc neni kx ngi gol kx nzanengr Mzteadau, naonrx ngrdeng, x drkq ngrde. ☆ 16 Mzteadau trpnzng nrlarde kxboi, a' kx namu-txpwzlr esz'. Enjrl kc anele mzteadau mz neni kc tqmalele, x krlzbzle stadia siu-nzpnu-esz'-nrade-li (12,000), (kc tqngi kilomita siu-li-trtqki-pwx (2,400)). Nzboi-krde, nzetupx-krde x me krlzlbz drkq ngrde, kxnamu-txpwzlr esz'. 17 Enjrl kc ane-kzle nzvekr drkq ngr Mzteadau, x krlzbzle kubit trtqki-esz'-nznpu-pwx-nrade-pwx (144), (kc tqngi mita nznpu-esz'mz-nrade-esz'mz (66)), vzpxm mz noabx kc tqane-ngrde, kc tqngi noabx sc leplz. *

18 Drkq ngrde nzwz esz'ngr mz rplz kxprki, x Mzteadau esz'-krde nzwz esz'ngr mz gol kxlq, x nznpu-nrade-apule dzpq. ☆

19 Nou rplz kcng mz drkq ngr Mzteadau nzmrlzng murde nzwzng mz rplz kxlqlwx. Nou drkq kc kai rplz kxprki, krali rplz kxblutxpx apule nzopxkr bongavz mz nrlc kxngrlx, kratq rplz kxbx, krapwx rplz kxmqbq. 20 X kranzlvqn rplz kxbotapz', kraesz'mz rplz kxpc, krarlimz rplz kxplctxpx, krartqmz rplz kxblu apule nzblukr bongavz, krarpwxmz rplz kxyzlo, kranzpnurplz kxplc, kranzpnurplz esz'-nrade-esz' rplz kxbla, x kranzpnurplz esz'-nrade-li rplz kxprpol. 21 X naonrx kcng nznpu-esz'-nrade-li nzwzng mz prl kxlqlwx amrlx. Naonrx esz' kc tzwzng mz prl

☆ 21:15 Esikel 40:3 * 21:17 Mz ngalrde lcng, opxm kx nabz 12,000 x 144 nzymne-ebzpx-ngrdr nabz 12. Murde nabz 12 vzm mz mzlir rilldr. 12 X 1,000 = 12,000. 12 X 12 = 144. Mz Nzryrngrkxtr, nabz 12 nznpu-nrade-apule dzpq. ☆

☆ 21:18 Asaea 54:11-12

kxetu kx aglqppz' apule nelc, x lrpzki kxetu kc tqvz vau r Mzteadau nzwzng r mz gol, x nzlq-krde apule nzopxkr dzpq.

²² A' trpnzng r Mangr-nzangiongr kx mcx Mzteadau mrkc tqmnc-ngrbz Gct badr leplz nedeng. Murde Kxetu Gct kc tqrninr ncdr Nei Sip nzteqtrlr Mangr-nzangiongr mz nzangiongr nidr mz nrhc amrlx Mzteadau. ²³ X Mzteadau lc tryzlr-ngru mz zyzlr ngr nepi o temz, murde zluli r Gct ncdr Nei Sip, dela na-angrlxpele nide. ✧ ²⁴ X leplz kxnztubqng mrkcng amrlx mz nrhc, sa navzneng mz zyzlr ngrde, mz nzvz-nqblq-krde me pnz drtwr Gct. X king amrlx mz nrhc kcng tztubqng kz sa naprtrpzng mz Mzteadau, mz nzrglqlz-krdr Gct ncdr Nei Sip.

²⁵ Mzli kc bqnc, naonrx ngr taon nz bq mz nrhcxbq. A' mz Mzteadau kxm rna, naonrx ngr-deng trtxpengr nzrbqpx-ngrng, murde trpnzng nrhcxbq nrhcde. ²⁶ X leplz lcng tztubqng sa naprtrpzng mz Mzteadau. X sa natwzlr dztudrng kxmrlzvxing kxlqlwxng. ²⁷ A' trtxpnzng da kx trtakitrdeu mz nzobqkr Gct kx naprtrpzng mz Mzteadau, x trpnzng leplz kx nzrtrngz-abeaneng da kx myangr drtq, x kxnzpokiang. A' nangi txpwz krkcng drtqdr tzyrope mz Buk ngr Nzlung r sc Nei Sip, nidr lang kx naprtrng elr. ✧

22

Da Kxmrlzting Ngr Jerusalem Kxm rna

¹ Mz nibr nzmc-krnge Jerusalem kxm rna, aelwapx-kz-ngrm enjrl kc bange Lue ngr Nzlung r

✧ **21:23** Asaea 60:3, 11, 19-20 ✧ **21:27** Asaea 52:1; Esikel 44:9

yrlelzm mz tron nyz Gct ncdr Nei Sip, x nzopx-krde apule dzpq. ✧ ² Yrlekiole vau r lrpzki kc tqtavau Mzteadau, x nrlarde rlilrdr tungr Nounc ngr Nzlungr. X nzpa-krdr nzwrde nzpnu-esz'-nrade-li (12) mz yiz kxes'z', nzwrde esz' mz temz kxes'z'. X leu rdrng ngi dalr nzrkatzngr zyagox ngr nrkrdrdq leplz kxntubqng ngr mztea amrlx. ✧ ³ A' trpengr nzayrplapxngr kc tqyrlq pnz Gct, tqakipxle nide x leplz. A' Gct ncdr Nei Sip nawxbuomqng mz tron nyzdr Mzteadau. X kxnzawz nedrng amrlx na-angiolr nidr elr. ✧ ⁴ Mzli kc trpnzng doa kx mcle Gct. A' mzli lcpe krkcng tzyrtrpz drdq Gct mz rtrlrnztr, sc tzmctr-atepebzlr mzte, x sc tzkrlz-angidrpe-kzlr nide. ✧ ⁵ Trpnzng nrlckxbq mrlcde, x trnzsutiu drtwrdr zyzlr ngr nepi o lam, murde Kxetu Gct sa nayzlrpx-ngrbz badr. X leplz lcng sa nanginipe-kzdr king x nzaclve-krdr tqvzpe tqvzpe. X da kx mc-rmnr-ngrbo nide lape. ✧

Natq Enjrl X Natq Jisz

⁶ Zbz rpi-mop enjrl kc bange kx, “Natq lcng da angidr x takitrde nzabrkitr drtwr. X Kxetu rgu, Gct kc tqkabzle Mqngarde mz profet kcng bqnc, atwzlr-ngrmle ninge nzaelwapx-krbo mz kxnzawz nedeng amrlx da lcng tqycpe pipz nzprt-zkrdr.”

⁷ Rpi Jisz bagu kx,
“Lalztq-angidramu, murde mzli trnaboiu x ninge kc tqyzlupe-mopwc'. X sa namrlz bz mz doa

✧ **22:1** Esikel 47:1; Sekaraea 14:8 ✧ **22:2** Esikel 47:12; Nou 2:9

✧ **22:3** Sekaraea 14:11 ✧ **22:4** Nzrlaszng 33:20; 1 Timoti 6:16;

Matu 5:8; 1 Jon 3:2 ✧ **22:5** Asaea 60:19; Daniel 7:18

kcng tzyrlq-angidrlr natq kcng tqkapx Gct mz Buk lc, murde sa nakrlz-angidrlr da lcng amrlx mzli kc tqycpe pipz nzprtz-krdr.”

⁸ Ninge Jon. Xlrx x mcx da lcng amrlx tqaelwa-ngrm enjrl kc bange. X kx yrkrpxbz kc nzxlr-krnge x nzrmc-krnge da lcng, ninge kc tqr-weopebo zpr bade mz nzangio-krngele. ⁹ A' rpi-mople bange kx, “Bzkq! Angio txpwz Gct! Murde wztr-kzpo mz Gct, da kc tqwaiamu badr profet x leplz amrlx kcng tzyrlq-angidrlr natq kcng tqyclzm mz Buk lc. ¹⁰ Bzkq yrlq-kapqq natq kcng tqpipx Gct mz Buk lc, murde ycpe pipz nzkaputr-krmqng. ¹¹ Mz nzm-krde lcde, mzli r leplz nztekqtr-krdr nqm qkrdrng sc tqyrkrpxpe. X mzli ka, kxnzvv-rbrng sa navz zvz mz nzvz-rbr-krdr, x kxdrka'-ngrng sa navz zvz nzale-krdr da kxdrka'ngr. A' kxnztrng sa navz zvz mz nztr-krdr, x kxnztubqng sa navz zvz nzale-krdr da kxtubq.”

✧
¹² Rpi-mop Jiszs kx,

“Ninge Jiszs. Lalztq-angidrmamu, murde mzli trnzboi-krdeu x ninge kc tqyzlupe-mopwc'. X sa natwzmc da kx nayrlq-ngrbo mq leplz amrlx, navz-nqblqle nzwz-krdrng, kxmule-esz' kxmrlz o kxtrka.” ✧ ¹³ Ninge nou da amrlx x kx ayrkrpx da amrlx. X ninge kxrtwayz x kxrmnr-ngrbz. X ninge kz kx ryzutr da amrlx x kx amrbrtx mou.” ✧

¹⁴ Ninge Jon. Namrlzbz mz doa kcng lr-pzdr tqprki mz nztapzo-krdrng mz mepyr ngr Jiszs, murde takitrde nidr nzprtr-krdr

✧ **22:11** Daniel 12:10 ✧ **22:12** Asaea 40:10; 62:11; Sam 28:4; Jeremaea 17:10 ✧ **22:13** Asaea 44:6; 48:12

mz naonrx ngr Mzteadau x nzmukrdr nra Nounc ngr Nzlungr. ☆ 15 A' kzdung kz leplz kcng tzvz-nqblqlr nzmncngr kxtrka, trtx-pnzng nrvztr-krdr Mzteadau. Leplz kxnmulr seng: kxnzryzplengz-ngrng, kxnzrmwiming doa kx trngiu krnalzdr, kxnzrnibqng, kxnzangioldr mqngr drka' kxnzlvz, x kxnzmrlzbx badr nzpokia-zvzng.

16 “Ninge Jiszs. Ninge lc tqatwzlr-ngrbo enjrl nenge bamu mz nzipix-krbzle da lcng bamu, nimu kxnzrlxngiting mz makxtr kcng rlimz. Vzpx-angidrmc mz nqvi lr melrmqng King Devet. X apux Paglxnrlc, mz nzaelwapx-krnge Zbq KxmRNA ngr Gct.” ☆

17 Mqngrkxtr ncdR Olvz R Nei Sip nzrpibzlr bade kx, “Vzm!” X nekeng amrlx nzxlrR natqde narpikzlr kx, “Vzm, kx Kxetu Jiszs!” Neke drtwrde brlxkz navzm, murde narmnq Lue ngr Nzlungr kx nZRka-nrbalq. ☆

Aclvetioamu!

18 Ninge Jon. Aclvetioamu nimu kcng tzxlrR natq Gct kcng tqkapxle tqyclzm mz buk lc, murde namwxlrRtiamu. Murde doa kx ryrlqtr-mopwz kzdung natq kxnzpokianger mz natq kcng tqyclzpem mz buk lc, sa na-ayrplapx Gct mz nzayrplapxng kxtrka kcng tqpipxpele mz buk lc. ☆ 19 X doa kx katxpxle kzdung natq mz natq lcng tqkapx Gct tqyclzm mz buk lc, trpnzng nzmncpx-krmle Mzteadau kxtr, x trpnzng nzmukrde nra Nounc ngr Nzlungr,

☆ 22:14 Nou 2:9; 3:22 ☆ 22:16 Asaea 11:1, 10; Luk 1:78; 2 Pita 1:19; 1 Jon 3:2 ☆ 22:17 Asaea 55:1 ☆ 22:18 Lou Kcpwz 4:2; 12:32

mz nzkatxpxkr Gct da kxmrlzting kcng tqycm-
netrngr buk lc.

Vzm Kxetu Jiszs

²⁰ Jiszs kc tqycmnetr-ngrde da lcng amrlx rpile
kx, “Da zpwxtx! Mzli trnzboi-krdeu x ninge
kc tqyzlupe-mopwc'.” X kxnzrlxngiting amrlx
nzrpibzlr bade kx, “Eu, angida! Vz-anim, kx
Kxetu Jiszs!”

²¹ X ninge Jon krka'-ngrne kx Kxetu Jiszs naoka-
trle leplz kxnztrng nedeng amrlx mz zmrlz ngrde
kxmyalz. Eu, angida!

**Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 11 Nov 2022 from source files dated 30 Nov 2021

fb2b7f06-e254-5fb7-b59d-ee21d5d7a93f